

God Varana Biibiina  
Jon  
Igirumi  
(John)  
Vonaviakova

Weni vonaviakovina na ke Jon ita girumi ma wawaya muriyai iterei. Aposol Jon *God Varana Biibiina* igirumi na ivi akovita da Yesu na God Vonana Makamakii Nonowina. Ma tuna ivi wawayota da dobuwai wawaya kamosiyai imakai. Ma bade Jon ivoneta da ina kayowana da wawaya ini tumaghana da Yesu na God Natuna ma kata Viviyawa, tuna kubiine weni bukana igirumi. Ina kayowana da nani vitumaghaninai na yawasa makamakii nonowina ina panani.

Kunona Jon ivi akovita da God Vonana ma Yesu na sago, muriyai Yesu ina bera ghamaghamasi ivi sisiyei, matakirisi ivi debei da vonavaghata da tuna na God Natuna ma kata Viviyawa. Jon igiruma da Yesu matakira peyarina ibera yavui na muriyai nani berasi tepanai nota ghamaghamasi ivivi beyebeyena. Ma ina vibeyebeyena kamonai na wawaya nevanavana Yesu ivi tumaghane ma ikivini ma nevanavana na ke iti tumaghane ma ivi ghaviyei. Ma sapta 13 da ku 17 kamonai Jon ina giruma evonavoneta da muriyai Yesu ita patumi na nani didibarinai kana kivikivina yavata ere nuwaviinisi ivi nuwasago ma ikiiepepisi ma nota rewapanai ivovunaghisi da i nota ke ina peku, iyamna iakovi da ina rabobo. Ma ina giruma turinai Jon evonavoneta da Yesu ipatumi ma ivi tupavirei, ituparatui ma ikikava rabobowai ivomiiri ma irumatara kana kivikivina kurisi.

Jon ina giruma kamoni nota ghamana na Keriso tepanai yawasa makamakii nonowina taviyya. Ma iyavo kava itumaghana da Yesu na keta, vonavaghata ma yawasa na tuna puyona wekarakava eviiviiya. Weni bukana kamoni aviyavisina mara nonowa ita yawasa kamoni emakamakai na eviiviiya ma nani miibiisi tepanai kanuma ina ku nevanewa akova ghamana ibeyebeyena. Kamoni na okowa, parawa, yasegana, sipu kii koyakoy- agha yavata, ma greipi uravina amena yavata.

Jon ina nota weni nakanani irereghi.

Sapta 1:1-18 Yesu na vona ma dobu kana yasegana.

Sapta 1:19-51 Jon Yesu ibabataito. Ma Yesu nona wawayisi ivinesi da kana kivikivini.

Sapta 2:1 da ku 12:50 Yesu ibababa ma ina biga iber- aberai.

Sapta 13:1 da ku 19:42 Yesu ina biga turina Jerusalem kamoni ma barabaranai.

Sapta 20:1-31 Bada Yesu rabobowai ivomiiri ma wawayi kurisi irumataru.

Sapta 21:1-25 Sisiya ku tepana na Yesu Gariri do bunai irumataru.

*Keriso na vona ma dobu kana yasegana.*

<sup>1</sup> Karenai na Vona imakamakai. Tuna na God yavata imakamakai, ma tuna na God. <sup>2</sup> Ma karenai tuna na God yavata. <sup>3</sup> Tuniyai da bera kudubina iyamoni, mikedu tuna kegha na ke sago aviyavisina do buwai ita yamoni. <sup>4</sup> Tuna gwabinai na yawasa, ma nani yawasina na wawayi yasegana. <sup>5</sup> Ma yasegana gweyurina nubakutuwa kamoni ekarakarata ma nubakutuwa ke kovokovoghina da ita ghekuyowei.

<sup>6</sup> Ma God ina yonayona ivonatawei, tuna kana vava na Jon Babataito.\* <sup>7</sup> Ipsi da nani yaseganina iti debei da wawaya peyarisi iti tumaghane. <sup>8</sup> Ipsi da yasegana kurisi iti debei, ma tuna na ke yasegana. <sup>9</sup> Ma wawaya ivi akovisi da yasegana vaghata na ku dobu ina nekiibau da wawaya peyarisi yasegana ina veresi.

<sup>10</sup> Namanaki da tuna tepanai God dobu iyamoni ma kegha da ku dobu inekiibau na wawaya dobuwai iveyiyei. <sup>11</sup> Ipsi ina ku dobu vaghata ma ina wawaya kurisi ma kegha da ibarei. <sup>12</sup> Ma wawaya viya kava ina sisiya iviyya ma ivi tumaghana na ti damsi ivonesi da God natunatuna. <sup>13</sup> Ma God natunatuna i yawasa na God gwabinai ipisi. Ma nani yawasina na ke kaekiki mau bo tomowa kawana yavata gwabisiyai ita pisi.

<sup>14</sup> Ma Vonana ivi wawaya da yavata tamakii patapata. Tuna na God Natuna sago kava na kana kadara kakitai. Ma agabiibai ma vonavaghata gwabinai irakata kirakai.

<sup>15</sup> Jon namada ivoneta bo, “Weni wawayina avivi sisiyei na, ‘Tuna murikuwai ina pisi. Ma ighekuyoweku, iyamna imakamakai ma muriyai da atupuwa.’”

<sup>16</sup> Ma ina agabiibai kudubina peyarita damina tavi-iviyya ma ina vibiibiina mara nonowa everevereta. <sup>17</sup> Vonaviyoyovana na God ivi damani Moses kurina da iti debei wawaya kurisi. Ma agabiibai ma vonavaghata na Yesu Keriso\* gwabinai ipisi. <sup>18</sup> Ke meyani wawaya sago God ita kitai. Natuna sago kava na God yavata ivi kovokovoghana. Tuna ina Mamai yavata na sago. Ma ivi akakovita da God na iyai.

---

\* 1:6: Mat 3:1; Mak 1:4; Luk 3:1-2      \* 1:17: Keriso: Grik damsi gamosi evonavona bo ‘Keriso’ ma Hibru damsi gamosi evonavona bo ‘Mesaya.’ Ivi ruwa iyamna ‘God ina Vivinevine Wawayina.’

*Jon Babataito ina vibeyebeyena.*

*(Mat 3:1-12; Mak 1:1-8; Luk 3:1-18)*

<sup>19</sup> Jiu damsi i babada ghamaghamasi Jerusalem kamoni taparoro babadisi ma Livai damsi ivonatawesi Jon kurina ma ivi tarakiyanei bo, “Tam na iyai?”

<sup>20</sup> Ma Jon ke ita bara bo ita yabumana ma ivi debe meyei, ivonapotesi bo, “Taku na ke God ina Vivinevine Wawayina.”

<sup>21</sup> Ma ivi tarakiyanei bo, “Nakanani na tam iyai? Tam peroveta Elaidiya bo?”\*

Ma ivonapotesi bo, “Kegha, taku ke tuna.”

“Tam na nani perovetina kakoyakoyaghi bo?”†

Ma ivonapotesi bo, “Kegha.”

<sup>22</sup> Ma damsi ivona bo, “Nakanani na tam iyai? Kevonekai da kana vovira akii babada kurisi ma kana vonesi da tam iyai.”

<sup>23</sup> Jon ivonapotesi ikikava peroveta Aisaya igiruma na nakanani ivonesi bo,

“Taku na wawaya gamona warereyai erurukwatu,

‘Keta maninina koberai, Bada kubiine.’”\*

<sup>24</sup> Ma Perisi damsi wawaya viya ivonatawesi ma <sup>25</sup> ivi tarakiyanei bo, “Mikeda tam ke Keriso, ke Elaidiya bo ke peroveta na avi kubiine kebababataito?”

<sup>26</sup> Ma Jon ivonapotesi bo, “Taku okowai abababataito. Ma kamomiyai wawaya sago ke kotakovi. <sup>27</sup> Tuna tomowina murikuwai epipisi. Ighekuyoweku, taku ke wawaya kiimataniiku da kaena kana terepapara ata rupami.”

<sup>28</sup> Weni berasi peyarina itupuwa Betaniyai, Jordan okowina nevanai, Jon nani dobunai ibababataito.

---

\* 1:21: Deut 18:15, 18; Mal 4:5 † 1:21: Deut 18:15 kamoni Moses igiruma da mara sago peroveta ghamanakina ina nekiibau kurisi. Ma Jiu damsi patana da nani perovetina ekoyakoyaghi. Tuna kubiine wawaya Jon ivi tarakiyanei da tuna vaghina wawayina bo kegha. \* 1:23: Isa 40:3

*God ina sipu gegeyina.*

<sup>29</sup> Ma mara itome na Jon, Yesu ikitai ipipisi kurina na ivona bo, “Kokitai, God Ina Sipu Gegeyina epipisi da dobu ina berabero ina viitawei. <sup>30</sup> Weni wawayina avivi sisiyei maranai avona bo, ‘Tomowina murikuwai epipisi na ighekuyoweku, tuna namada imakamakai ma muriyai da atupuwa.’ <sup>31</sup> Taku bade ke atakovi da tuna na nakanani, ma apisi da okowai abababataito, iyamna aidebei da Israel inakovi da tuna iyai.”

<sup>32</sup> Ma Jon aviyavisina matanai ikitai na ivi debei, ivona bo “Kanuma Vovokaravina akitai nakanani ma gabubu kunumai ioru da tomowina ku tepana. <sup>33</sup> Taku patana da ke atakovi da tuna iyai ma kegha da Wawayina ivonataweku da okowai abababataito tuna ivoneku bo, ‘Tomowina kuna kitai ma Kanuma Vovokaravina inoru ku tepana na tuna wawayina Kanuma Vovokaravina ina veremi.’ <sup>34</sup> Taku akitai na aidebei da tuna na God Natuna.”

*Nona wawayisi Yesu ivinesi da kana kivikivina.*

<sup>35</sup> Mara itome ma Jon kana kivikivina ruwa yavata patana da nani gawarinai imakamakai. <sup>36</sup> Ma Jon ikitai da Yesu ibaba inenae na ivona bo, “Kokitai, tuna na God ina Sipu Gegeyina.”

<sup>37</sup> Kana kivikivina ruwa ina sisiya ivi yanei na inae da Yesu ikivini. <sup>38</sup> Yesu imiiritavire ikitisi da ikivikivini na ivi tarakiiyanesi bo, “Aviyavisina kokayokayowei?”

Ma damsi ivonapotei bo, “Rabai (iyamna vibeyebeyena wawayina), tam na meni dobunai kemakamakai?”

<sup>39</sup> Yesu ivonapotesi bo, “Kopisi da kona kitai.” Ma tuna na namada ravi madeghinai. Damsi ikivini inae da ina makamakai ikitai, ma yavata nani dobunai imakii kupom.

<sup>40</sup> Nani kamonai na Anduru, (tuna Saimon Pita tina kikei.) Maranai Jon Babataito ina sisiya ivi yanei na

Yesu ikivini. <sup>41</sup> Ma yaghiyaghinai Anduru inae da ina tuwa Saimon ipanani ma ivonei bo, “God ina Vivinevine Wawayina kapanani.” (Tuna iyamna Keriso.) <sup>42</sup> Ma irutini ipisi Yesu kurina.

Yesu ikitai ma ivona bo, “Tam Jon natuna Saimon, wawaya ina kwatum da Kepas.” Ma nani vavana Grik gamosiyai na Pita. (Kepas ma Pita ivi ruwa na iyamsi ‘wakima.’)

*Yesu Piripo da Nataniyera ikwatusi.*

<sup>43</sup> Mara itome na Yesu ivi karei da ita nae ku Gariri. Ibaba inenae da Piripo ipanani na ivonei bo, “Kekiviniku.”

<sup>44</sup> Piripo na Anduru da Pita nakanani, peyarisi i kwanatu na Betsaida. <sup>45</sup> Ma Piripo inae da Nataniyera ipanani ma ivonei bo, “Wawayina kapanani. Moses vonaviyoyovana kamona i girugirumi ma bade peroperoveta i giruma kamona ivivi sisiyei. Tuna Yesu, Nasaret wawaya, Josepa natuna.”

<sup>46</sup> Nataniyera ivona bo, “Nasaret. Kamona aviyavisina biibiina ina tupuwa?”

Ma Piripo ivonapotei bo, “Kepisi da kuna kitai.”

<sup>47</sup> Maranai Yesu Nataniyera ikitai ipipisi na ivona bo, “Weni tomowina tuna Israel vaghata. Tuna na wawaya kiimatanina.”

<sup>48</sup> Ma Nataniyera ivona bo, “Ikikava kuakoviku?”

Yesu ivonapotei bo, “Muriyai da Piripo ita kwatum na akitim koweya roguna kumakamakai.”

<sup>49</sup> Ma Nataniyera ivonakiyaragha bo, “Bada, tam God Natuna, Israel kana Kiivavo.”

<sup>50</sup> Yesu ivonapotei bo, “Avonem da akitim koweya roguna kumakamakai, tuna kubiine kuvi tumaghaneku, bo? Karakava bera ghamaghamasi kuna kitai ke nakanani ma weni berana.” <sup>51</sup> Ma ivonesi bo, “Vonavaghata avon-avonemi da karakava kona kitai da kunuma ina tamotate

ma God ina aneya ina gheghae ma inororu Wawaya Natusi kurina.”‡ \*

## 2

### *Tavine kamna Keina kwanatuna kamonai.*

<sup>1</sup> Mara viarobina kamonai tavine itupuwa kwanatu kana vava Keina, Gariri dobunai. Ma Yesu ina maduwa na nani kamonai. <sup>2</sup> Ma bade Yesu kana kivikivina yavata ivonesi da nani ku kamna irui. <sup>3</sup> Ma wain ikovi na ina maduwa Yesu ivonei bo, “Wain ivi kovini.”

<sup>4</sup> Ma Yesu ivonapotei bo, “Wavine, avi kubiine kuvoneku da aviyavisina ana berai. Aku mara ke ita pisi.”

<sup>5</sup> Ma kegha da ina maduwa bigabiga wawayisi ivonesi bo, “Aviyavisina ina vonemi na koberai.”

<sup>6</sup> Ma ririsiyai na okowa kibubusi ghamaghamasi miikovimasago iruwanamiimiiri. Nani kibubusi wakimiyai ipapa na Jiu damsi i kiki inununuri da imasi itepotepokowakowa, tuna ivi matakira da nuwanuwasi na yagharina.\* <sup>7</sup> Yesu bigabiga wawayisi ivonesi bo, “Kibubusi na okowa kovi tupotupo.” Damsi okowa itepo da ighe kawa barasiyai. <sup>8</sup> Ma ivonesi bo, “Wekarakava na gisina kotaraivui ma kokavari konae da kam badana kurina.” Ikavari inae da iverei, <sup>9</sup> ma badana nani okowina ikaratovoni. Okowina na namada ivi viravira da wain. Ma ke itakovi da mimei ipisi ma bigabiga wawayisi na iakovi, iyamna okowa na ti ivui. Tuna kubiine kam badana tomowina itatavine ikwatui ma itinaviviri ku ririna. <sup>10</sup> Ma ivonei bo, “Wawaya peyarisi karenai na wain biibiina evereverena ma wawaya eumuma da damisi

---

‡ 1:51: Wawaya Natusi na iyamna God ina Vivinevine Wawayina, wawaya kii Viviyawa, Keriso bo Mesaya. Mara viya Yesu iteregavui da tuna mani ivivi sisiya meyei. Nani marasiyai ivonavona da tuna na ‘Wawaya Natusi,’ sisiyina ivi matakira da kunumai ioru ku dobu da ivi wawayota. \* 1:51:

Gen 28:12 \* 2:6: Kibubu sago na 80 bo 120 litas ruvana.

eviiviiya ma muriyai berona evovokiibuwei. Ma tam na biibiina kuvotani da wekarakava kuvokiibuwei.”

<sup>11</sup> Weni tuna na Yesu ina bera ghamana karena iberai Keina kwanatunai, Gariri kamonai. Kana kadara ivi debei da kana kivikivina ivi tumaghanei.

<sup>12</sup> Weni berana murinai Yesu ma ina maduwa, titina yoghyogho ma kana kivikivina yavata ioru ku Kapeniyam. Ma nani dobunai imakii mara gisina.\*

*Yesu Taparoro Numana igigiri.*

*(Mat 21:12-13; Mak 11:15-17; Luk 19:45-46)*

<sup>13</sup> Marana inenekiibau da Jiu damsi i kaporagha kana vava Pasova ma Yesu ighae ku Jerusalem.\* <sup>14</sup> Ma Taparoro Numana garina kamonai ipanani da totomomowa kau, sipu ma gabubu ivivi gimara. Ma viya na kemakema tepasiyai imakamakai ma mane ivivi vovivirana. <sup>15</sup> Tuna kubiine Yesu urava iviyya da wasira iyamoni ma peyarisi Taparoro Numana garina kamonai wawaya i sipu ma kau yavata ikugerisi. Ma bade mane vivovivirana wawayisi i mane ikiiririghi ma i kemakema ivi kuvirevire.† <sup>16</sup> Ma iyavo kava gabubu ivivi gimara na kurisi ivona bo, “Weni sawarisi koturakiikiibuwana. Avi kubiine tami aku Mamai ina Numa koruvovirei da vigimagimara gawarina?” <sup>17</sup> Ma kana kivikivina inotapanani da giruma katamana ivona bo, “Am Taparoro Numana na aku kayowana ghamana, tuna kubiine nuwapoyina ekiikiivunuku.”\*

<sup>18</sup> Ma Jiu babadisi ivonei bo, “Avi matakirina ghamana kuna berai da kanakovi da am rewapana imakamakai na weni berana kuberai?”

---

\* 2:12: Mat 4:13      \* 2:13: Exod 12:1-27      † 2:15: Pasova kamna kubiine na wawaya i dobu bogii ma bogiyyai iriyesi ma i mane kitasi bogii ma bogiyyai. Wawaya viya i biga da mane ivivi vovivirana da Jiu damsi i ku mane. Ma ghamoghamo igimagimara suwara kubiine.      \* 2:17: Psa 69:9



<sup>19</sup> Yesu ivonapotesi bo, “Weni Taparoro Numana kona tinarikai ma mara viarobina kamonai ana ruepa meyei.”\*

<sup>20</sup> Ma Jiu babadisi ivonapotei bo, “Weni Taparoro Numana madegha 46 kamonai ivowai ma tam, kovokovoghim da mara aroba kamonai kuna ruepa meyei, bo?”

<sup>21</sup> Ma Yesu na ke Taparoro Numana ita vonavonei ma tuna mani tupuwina ivivi sisiyei. <sup>22</sup> Maranai rabobowai ivomiiri, kana kivikivina inotai da Yesu ikikava ivi sisiya. Ma nani sisiyina ma giruma katamana ivi tumaghanei da vonavaghata.

*Yesu wawaya peyarisi i nota iakovi.*

<sup>23</sup> Yesu na Jerusalem kamonai Pasova kamna kubiine, ma matakira ghamaghamasi iberai da wawaya peyarisi ikitai ma ivi tumaghana da tuna na God ina Vivinevine Wawayina. <sup>24</sup> Ma Yesu na wawaya peyarisi i nota iakovi, tuna kubiine ke iti tumaghanesi. <sup>25</sup> Tuna ke wawaya gwabisiyai nota ita viiya da ti na ikikava, iyamna namada iakovi da aviyavisina nuwanuwasi kamonai emakamakai.

### 3

*Yesu ma Nikodimas.*

<sup>1</sup> Jiu damsi i bada ghamana sago, tuna na Perisi ma kana vava Nikodimas. <sup>2</sup> Didibarai ipisi Yesu kurina ma ivonei bo, “Bada, kakovim da tam vibeyebeyena wawayim ma God ivonatawem, iyamna iyavo kava gwabisiyai God ke ita makamakai na ke kovokovoghina da weni berasi ghamaghamasi ina berai.”

---

\* 2:19: Mat 26:61, 27:40; Mak 14:58, 15:29

<sup>3</sup> Yesu ivonapotei bo, “Vonavaghata avonavonem da iyavo kava ina tupuwame na ti kava God ina vikiivavona ina kitai.”

<sup>4</sup> Ma Nikodimas ivona bo, “Ikikava tomowa magurina ina tupuwame? Ke kovokovoghina da ina ruime ina maduwa ku manawina da ina tupuwame!”

<sup>5</sup> Yesu ivonapotei bo, “Vonavaghata avonavonem da wawaya God ina ku vikiivavona ke ina rui da kunona okowai ma Kanuma Vovokaravinai ina tupuwame na ina rui. <sup>6</sup> Wawaya ina maduwa ini tuwei na wawayota. Ma wawaya Kanuma Vovokaravinai ina tupuwa na tuna God rapenai. <sup>7</sup> Aku sisiya ke kuna tataghanei. Ma ke-tupuwame. <sup>8</sup> Ikikava yanunu ina kayowanai everaverau, gugurina kuni yanei ma ke kutakovi da mimei epipisi bo mike enenae, bade nakanani wawaya Kanuma Vovokaravina ina rewapanai ina tupuwame.”

<sup>9</sup> Ma Nikodimas ivi tarakiiyanei bo, “Weni berana na ikikava?”

<sup>10</sup> Ma Yesu ivona bo, “Tam na Israel damsi i vibeye-beyena wawayina ghamana. Ma weni berasi ikikava na ke kutakovi? <sup>11</sup> Vonavaghata avonavonem da aviyavisina kakakovi na kaisisiyei, ma aviyavisina kakitakitai na kavonavonaverena. Ma kegha da tami na akii vonaverena ke kota kayokayowei. <sup>12</sup> Dobu kana bera aisisiyei na ke kota vivitumaghana, na bade kunuma berasi ati sisiyei na koti tumaghaneku bo kegha? <sup>13</sup> Ke sago iyai ku kunuma ita ghae, ma wawaya sago kava kunumai ioru, tuna na Wawaya Natusi.”

<sup>14</sup> “Ma ikikava Moses warereyai mota iyamoni ma kii tepanai iterei ma iruepai, nakanani Wawaya Natusi ina ruepai ina ghae, \* <sup>15</sup> da wawaya iyavo kava ini tumaghanei na yawasa makamakii nonowina

---

\* 3:14: Num 21:9

ina panani. <sup>16</sup> God wawaya dobuwai nuwanuwasi ivii kirakiyei da Natuna sago kava ma iverena da iyavo kava ini tumaghane na ke ina rabobo ma yawasa makamakii nonowina ina viiya. <sup>17</sup> Ma God Natuna ivonatawei na ke dobuwai kovogha ita rereghi kubiine ma dobu iti yawai kubiine.”

<sup>18</sup> “Ma iyavo kava God Natuna itumaghane na kovogha ke ina panani. Ma iyavo kava ke ita vivitumaghana na namada ivonakiiyaragha da kovogha ina veresi, iyamna Natuna sago kava ke iti tumaghane. <sup>19</sup> Iki kava God wawaya ini tupaviresi ma ini wavusi na weni. Yasegana ipisi ku dobu, ma wawaya ibarei da didibara ekayokay-owe, iyamna i bera na beroberosi. <sup>20</sup> Wawaya berabero eberabera na yasegana ke ita kayokayowe, ma ku yasegana ke ina pisi, iyamna eyabuyabumana da i bera beroberosi ina kayovidebei. <sup>21</sup> Ma wawaya vonavaghata tepanai emakamakai na ekayokayowe da ku yasegana ina rui, iyamna yaseganina ini debei da ina bera kudubina na God ina kayowana kava eberabera.”

*Yesu da Jon Babataito.*

<sup>22</sup> Weni berana murinai Yesu ma kana kivikivina yavata inae ku Judiya, ma nani dobunai imakii gisina ma wawaya ibababataitosi. <sup>23</sup> Ma Jon na Ainon dobunai ibababataito. Tuna Salim kwanatuna baranai, iyamna nani gawarina na okowa dobuna. Tuna kubiine wawaya peyarisi inenae nani ku gawarina da ita babataito. <sup>24</sup> Weni berasi ivi nao, muriyai da Jon ku gabura iterei.\*

<sup>25</sup> Mara sago Jon kana kivikivina ma Jiu wawaya sago yavata ivivi vonapasipasiyana da iki kava i kiki ita nunura bubuni da tupuwisi ita kowai da iti matakira da nuwanuwasi yagharina. <sup>26</sup> Ma inae Jon kurina ma ivona

---

\* 3:24: Mat 14:3; Mak 6:17; Luk 3:19-20

bo, “Bada, nani tomowina Yesu kenotanotai, tota Jodan okowinai ma wawaya kubababataitosi na tuna yavata nani dobonai ma bade kuvi sisiyei kurikai. Ma karako tuna ivi karei da wawaya ebababataitosi na peyarisi enenae kurina.”

<sup>27</sup> Ma Jon ivonapotesi bo, “Wawaya puyo ke ina vii wapawapai. God kunumai ina kina kava biga ina rereghi. <sup>28</sup> Tami kovi yaneku da avi debeku, avona da taku ke God ina Vivinevine Wawayina. Ma God ivonataweku da avi nao.\* <sup>29</sup> Taku nakanani ma tomowa ita tavine na kana miiritana. Ma ina wavine ivopapari na tuna kava rapenai. Tuna kubiine maranai aiyanei da tuna ina wavine yavata ivi kiisagosi na ainuwabiibii kirakai kubiisi. <sup>30</sup> Tuna ini wawayaghama da kana kivikivina ina peyari ma taku na wawayota, aoru kirakai.”

### *Wawaya kunumai ipisi.*

<sup>31</sup> Wawaya kunumai ipisi, tuna na ighe kirakai. Ma wawaya dobuwai ipisi, tuna na dobu rapenai ma dobu ina bera isisiyei. Ma meni wawayina kunumai ipisi na tuna na wawaya peyarisi ighekuyowesi.\* <sup>32</sup> Tuna aviyavisina ikitai ma ivi yanei na isisiyei ma wawaya ke peyarina ina sisiya ita viiya. <sup>33</sup> Ma iyavo kava ina sisiya iviia na ivi debei da God na vonavaghata isisiyei. <sup>34</sup> Ma wawayina God ivonatawei na God vonana isisiyei, iyamna God, Kanuma Vovokaravina ivere kudubi. <sup>35</sup> Mamai God, Natuna nuwanuwana ivii kirakiyei da rewapana kudubina iverei.\* <sup>36</sup> Ma tam iyai God Natuna kuni tumaghane na yawasa makamakii nonowina kuna panani. Ma tam iyai God Natuna kuna barei na nani

---

\* 3:28: Jon 1:20      \* 3:31: Jon igiruma bo, ‘wawaya kunumai ipisi’ na Yesu Keriso isisiyei. Ma igiruma bo, ‘wawaya dobuwai ipisi’ na Jon Babataito isisiyei.      \* 3:35: Mat 11:27; Luk 10:22

yawasina ke kuna panani, iyamna God ina nuwapughu kuna kamowani.

## 4

### *Yesu da Sameriya wavine.*

<sup>1</sup> Perisi damsi ivi yanei da koroto ghamana inenae Yesu kurina ma ibababataitosi da kana kivikivina, ke nakanani ma Jon. <sup>2</sup> Ma kegha, vonavaghata da ke Yesu ita bababataito ma kana kivikivina kava iberaberai. <sup>3</sup> Maranai Bada Yesu akovina iviyya da Perisi damsi ivivi sisiyei na ivomiiri da Judiya ikuyowei inenae ku Gariri. <sup>4</sup> Sameriya dobuna kamoni ibaba inenae <sup>5</sup> da ku kwanatu sago inekiibau, kana vava Saika.

Nani kwanatuna ririnai na mara katamaninai Jeikap, natuna Josepa dowar iveri. Ma nani dozunai Jeikap kana okowa iyabai.\* <sup>6</sup> Namada madegha iveruvivira ma Yesu ibaba da ininina ibara, tuna kubiine dogo kawa baranai ivivi yakam.

<sup>7</sup> Ma Sameriya wavine ipisi da okowa itivu. Ma Yesu ivona bo, “Kade, okowa kuta veruku atuma.” <sup>8</sup> Ma kana kivikivina na ke yavata, ti na namada inae ku kwanatu da vavai ita gimara.

<sup>9</sup> Ma wavinena ivonapotei bo, “Tam na Jiu tomowa ma taku na Sameriya wavine. Iki kava na kuvoneku da okowa ana verem?” Nakanani ivi sisiya iyamna Jiu ma Sameriya damsi ke ita vivinuwaviina bubuna.\*

<sup>10</sup> Ma Yesu ivonapotei bo, “God ina puyo ke kutakovi ma bade ke kutakovi da iyi uma kubiine kurim inowi. Mikeda kutakovi na kuti nowi da okowa yawayawana ita verem.”

<sup>11</sup> Ma wavinena ivona bo, “Bada, tam ke sago tarai-vivu gwabimuwai da okowa kunivui. Ma bade dogo na ioru kirakai. Ma iki kava okowa yawayawana kuna viiya

---

\* 4:5: Gen 33:19; Josh 24:32      \* 4:9: Ezra 4:1-5; Neh 4:1-2

da wawaya inumai na yawasa ina panani? <sup>12</sup> Akii kaekiki Jeikap na wawaya ghamana ma tuna weni dogona iverekai. Rorova mara katamaninai natunatuna ma i ghamoghamo yavata weni dogonai iumuma. Ma tam, kevonavona da Jeikap kughekuyowei, bo?”

<sup>13</sup> Ma Yesu ivonapotei bo, “Wawaya iyavo kava weni okowina inumai na kaiyosi ina kanakaname. <sup>14</sup> Ma wawaya iyai taku okowa ana verei inumai na ke meyani kaiyona ina kanakaname. Ma okowina ana verei na yawayawana ma ina yawasa kamonai ina vusivusira da yawasa makamakii nonowina ina viiviiya.”

<sup>15</sup> Wavinena Yesu ivonei bo, “Bada, nani okowina kevereku da kaiyoku ke meyani ina kanakana ma ke ana vovirame wike da okowa anivu.”

<sup>16</sup> Ma Yesu ivonei bo, “Kenae da kawam kuna vonei ma kona pisi.”

<sup>17</sup> Ma wavinena ivonapotei bo, “Taku kawaku kegha.”

Ma Yesu ivona bo, “Tam kuvonavaghata da kawam kegha. <sup>18</sup> Vonavaghata da kakawam miikovi. Ma to-mowina wekarakava yavata komakamakai na ke kawam. Kuvi sisiya bubuna.”

<sup>19</sup> Ma wavinena ivona bo, “Bada, wekarakava akovim da tam na peroveta. <sup>20</sup> Akii kaekiki mau na weni koyana tepanai ivovokavakavara, ma tami Jiu dami kovonavona da Jerusalem kamonai kava kata vokavakavara.”

<sup>21</sup> Yesu ivona bo, “Wavine, kevi tumaghaneku. Mara epipisi da Mamai God ke weni koyanai bo Jerusalem kamonai kona vokavakavari. <sup>22</sup> Ma tami Sameriya dami ke kotakovi da iyi kovovokavakavari ma tokai na kakovi, iyamna God ina keta da wawaya ini yawasisi na Jiu damkai gwabikiiyai. <sup>23</sup> Ma marana ipipisi da inekiibau da vitu-maghana damsi Kanuma Vovokaravinai ma vonavaghata tepanai Mamai ina vokavakavari, iyamna wawaya ekwekwisi da nakanani ina vokavakavara kurina. <sup>24</sup> God na

kanuma, tuna kubiine iyavo kava ina vovokavakavari na Kanuma ina rewapanai ma vonavaghata tepanai kava ina vokavakavari.”

<sup>25</sup> Ma wavinena ivona bo, “Akovi da mara sago God Ina Vivinevine Wawayina ina pisi. Ina pisi na bera kudubina kurikai ini debei.”

<sup>26</sup> Ma Yesu ivona bo, “Taku aisisiya kurim na vaghina wawayiku.”

<sup>27</sup> Ma ivivi sisiya kamonai na Yesu kana kivikivina inekiibau ma ivi deyei da wavine sago yavata ivivi sisiya. Ma ke sago iti tarakiyanei bo, “Wavine, avi kekayokayowei?” Bo, “Bada, avi kubiine weni wavinena yavata kosisiya?”

<sup>28</sup> Ma wavinena kana okowa kibubuna ikuyowei ma ivovira ku kwanatu da waway kurisi ivi sisiya. <sup>29</sup> “Kopisi ma tanae, tomowa sago kona kitai. Bera kudubina aber- aberai na ivi debei. Tuna na God ina Vivinevine Wawayina, bo?” <sup>30</sup> Vaghina ma damsi kwanatu ikiibutawei ma ibaba inae Yesu kurina.

<sup>31</sup> Nani kamonai na kana kivikivina ivonei bo, “Bada, vavai kekani.”

<sup>32</sup> Ma ivonapotesi bo, “Taku kaku vavai emakamakai na tami ke kotakovi.”

<sup>33</sup> Kana kivikivina ti mani kamosiyai ivi tarakiikiyana meyesi bo, “Kade, iyi vavai iverei?”

<sup>34</sup> Ma Yesu ivona bo, “Kaku vavai na weni. Wawayina ivonataweku na ina kayowana ana berai da bigana ivereku ani koviya. <sup>35</sup> Tami kovonavona bo, ‘Nawaravi ruwamaruwa ma kabiiyago kana mara.’ Avonavonemi da matami ekita, ma ku vao kokita da whiti namada ipoki da bori kana mara inekiibau. <sup>36</sup> Ma wekarakava na bori damsi namada evovoidaburana da i miiya eviiviiya. Ma aviyavisina evovoidaburana na waway, ti na iyavo kava yawasa makamakii nonowina eviiviiya. Ma nigu wawayina ma boribori wawayina inuwabiibai. <sup>37</sup> Vonavaghata

isisiya da, ‘Sago enigunigu ma sago eboribori.’ <sup>38</sup> Ke kota nigu ma kegha da avonavonatawemi da kona bori ma kona vovidaburana. Wawaya viya biga ghamana iberai ikovi, ma tami na koboribori da i biga iyamna koviiviiya.”

<sup>39</sup> Nani kwanatunai Sameriya damsi ipeyari kirakai Yesu ivi tumaghane, iyamna wavinena ivonesi bo, “Aviyavisina aberaberi na kudubina Yesu ivi debeku.”

<sup>40</sup> Tuna kubiine maranai Sameriya damsi ipisi kurina na ivi nowi da yavata ita makai na ivi vaghinei da mara ruwa gwabisiyai imakai.

<sup>41</sup> Ma Yesu ina vibeyebeyena kubiine na bade ku tepana koroto ghamana ivi tumaghane. <sup>42</sup> Damsi wavinena ivonei bo, “Wekarakava kavi tumaghana, ke tam kuta vonekai kubiine, ma takii mani ina sisiya kavi yanei kubiine. Wekarakava kakovi da vonavaghata, tuna na dobu kana Viviyawa.”

*Yesu wawaya kikei ivi yawai.*

<sup>43</sup> Mara viruwina murinai Yesu, Saika kwanatuna iki-ibutawei ma inae ku Gariri dobuna. <sup>44</sup> Ma namada ivona bo, “Peroveta tuna mani ina dobuwai na wawaya ke ina vokaravei.”\* <sup>45</sup> Ma inekiibau ku Gariri na Gariri damsi ivi kiikiwei, iyamna rorova ti na inae ku Jerusalem Pasova kamna kubiine ma Yesu bera ghamaghamasi nani dobunai iberai na matasiyai ikitai.\*

<sup>46</sup> Yesu ivovirame ku Keina kwanatuna Gariri kamonai, rorova nani dobunai okowa iberai da ivi wain. Ma bada ghamana sago na ina kwanatu na Kapeniyam ma natuna igubaga kirakai.\* <sup>47</sup> Ma badana sisiya ivi yanei da Yesu Judiya ikuyowei ma ivovira ku Gariri. Tuna kubiine inae kurina ma ivi nowi da yavata ita nae da natuna iti yawasi, iyamna gisina kava ma ita rabobo. <sup>48</sup> Yesu tomowina

\* 4:44: Mat 13:57; Mak 6:4; Luk 4:24

\* 4:45: Jon 2:23

\* 4:46: Jon

2:1-11



ivonei bo, “Tami ami vitumaghana kegha, ma ami kay-owana da bera ma matakira ghamaghamasi matamiyai kona kitai na koni tumaghana.”

<sup>49</sup> Ma tomowina ivona bo, “Bada, kevi yaghiyaghina ma natuku ina rabobo.”

<sup>50</sup> Ma Yesu ivonapotei bo, “Kenae ma natum ina yawasa.”

Tomowina Yesu ina sisiya ivi tumaghane ma inekuy-owei. <sup>51</sup> Inenae ma keta borinai ina bigabiga waway-ina ipanani ma sisiya biibiina ivonei da natuna namada iyawasa.

<sup>52</sup> Badana ivi tarakiiyane da mara avai natuna iyawasa. Ma ivonapotei bo, “Raviravi madegha imiimiirivivira na gubagina ikuyowei.” <sup>53</sup> Ma badana inotai da nani maranai Yesu ivonei bo, “Natum ina yawasa.” Tuna kubiine ina rakaraka yavata peyarisi Yesu ivi tumaghane. <sup>54</sup> Weni berana ghamana na Yesu ina matakira kana viruwa maranai Judiya dobuna ivoterei ma ivovirame ku Gariri.

## 5

### *Tomowa toka baranai iyawasa.*

<sup>1</sup> Nani murinai Yesu ighae ku Jerusalem Jiu damsi i kam kubiine. <sup>2</sup> Ma Jerusalem kamonai na toka sago kana vava Betesada, tuna na gari matuketina kana vava ‘Sipu’ ririnai. Ma nani tokana na tupatina miikovi imiiriviviri. <sup>3</sup> Nani gawarinai na koroto ghamana matapotapotasi ma digadigasi ivivi makiiyana. <sup>4</sup> (-)\* <sup>5</sup> Ma kamosiyai na sago idigadiga da madegha 38 ikovi. <sup>6</sup> Ma Yesu tomowina ikitai

---

\* <sup>5:4</sup>: Mara katamaninai giruma damsi peyarisi ves 4 ke ita terei. Ma viya na weni nakanani igirumi: ‘Bera sago mara nonowa nani dobonai ituputupuwa na weni, madegha nununai Bada ina aneya iororu da okowa isewasewai na gubagubagisi kamosiyai iyi ivivi nao iororu ku okowa na tuna wawayina iyawayawasa.’

ikenakena na iakovi da tuna namadani kava igubaga na ivona tovoni bo, “Kekayokayowei da kuna yawasa, bo?”

<sup>7</sup> Ma digadigana ivonapotei bo, “Bada, ke sago iyai da iti viteku ku toka ita tereoruweku maranai okowa ise-wasewai. Aberabera tovoni da atoru na wawaya maghinoku epapapari.”

<sup>8</sup> Ma Yesu ivonei bo, “Kevomiiri, am kepana kekavari ma kuna baba.” <sup>9</sup> Yaghiyaghinai tomowina iyawasa, ina kepana ikavari ma ibaba.

Weni berana na viyakam maranai itupuwa. <sup>10</sup> Tuna kubiine Jiu babadisi tomowina ivonei bo, “Karako na viyakam marana ma vonaviyoyovana kuvi kiigiiyei da am kepana kukavari.”\*

<sup>11</sup> Ma ivonapotesi bo, “Wawayina ivivi yawasiku na ivoneku bo, ‘Am kepana kekavari ma kebaba.’”

<sup>12</sup> Babadisi ivi tarakiiyane bo, “Iyi ivonem da am kepana kuta kavari ma kuta baba?”

<sup>13</sup> Tomowina ke itakovi da iyi ivi yawasi, iyamna Yesu namada ionagha da koroto ghamana ku kamosi irui.

<sup>14</sup> Nani berana murinai Yesu Taparoro Numana kamonai tomowina ipanani. Ma ivonei bo, “Kekitai, kuyawasa. Bera beroberosi kevoterei. Ke kuna voterei na nuwapoya ghamanakina ina tupuwa kurim.”

<sup>15</sup> Vaghina ma tomowina inae ma Jiu babadisi kurisi ivi mamatara da wawayina ivi yawasi na Yesu. <sup>16</sup> Ma Yesu weni berasi iberabera viyakam marasiyai, tuna kubiine Jiu babadisi ivi karei da ivivi tupaketowanei. <sup>17</sup> Ma Yesu ivonesi bo, “Aku Mamai mara nonowa ebigabiga, tuna kubiine taku bade nakanani ana biga.”

<sup>18</sup> Weni sisiyina kubiine na Jiu babadisi ivivi paparana kirakai da ita kiivunui. Viyakam marana kana sisiya bag-ibagina ivi kiigiiyei ma ke tuna kava, ma bade ivonavona

---

\* 5:10: Neh 13:19; Jer 17:21

da God na ina Mamai vaghata, nakanani ma God yavata iti yavayavatesi.

*God Natuna ina rewapana.*

<sup>19</sup> Yesu, Jiu babadisi ivonesi bo, “Vonavaghata avon-avonemi da God Natuna ke kovokovoghina da ina kina kava ina kayowana ina berai. Aviyavisina ekitakitai da ina Mamai eberaberai na tuna bade nakanani ina berai. Mamai ina berai na bade Natuna ina berai. <sup>20</sup> Ma Mamai Natuna nuwanuwana ivii kirakiiyei, tuna kubi-ine aviyavisina eberaberai na kudubina ini debei kurina. Vonavaghata da karakava matakira ghamaghamasi viya ini debei Natuna kurina da ina berai na ke weni matakirina nakanani. Kona kitai na koni deye kirakiiyei. <sup>21</sup> Iki kava Mamai eberaberai da wawaya raborabobosi evovomiiri ma yawasa evereveresi, bade nakanani Natuna iyavo kava ekayokayowesi na yawasa ina veresi. <sup>22</sup> Ma bade Mamai wawaya ke ini tupaviraviresi, iyamna nani rewapanina kudubina ivi damani Natuna kurina da tuna wawaya ini tupaviresi da meni tusi biibiisi ma meni tusi beroberosi. <sup>23</sup> Ivi damani da wawaya ikikava Mamai evovokaravei na bade nakanani Natuna ina vokaravei. Ma wawaya iyavo kava Natuna ke ina vokaravei na idebe meyesi da bade ina Mamai yavata ke ita vovokaravei, iyamna Mamai, Natuna ivonatawei.”

<sup>24</sup> “Vonavaghata avonavonemi, iyavo kava aku sisiya iyanei ma wawayina ivonataweku itumaghane na yawasa makamakii nonowina namada iviia ma God ke ini wavusi ma bade kovogha ke ina veresi. Ti damsi na rabobo ketana ivoterei ma idamana yawasa ku ketana. <sup>25</sup> Vonavaghata avonavonemi, marana epipisi na gisina kava ina nekiibau da wawaya kanumisi raborabobosi na God Natuna gamona ini yanei. Ma iyavo kava ini yanei na yawasa

ina panani. <sup>26</sup> Ikikava Mamai gwabinai yawasa ekiikiibau na iberai da bade nakanani Natuna gwabinai yawasa ekiikiibau. <sup>27</sup> Ma rewapana kudubina iverei da wawaya ini tupaviraviresi, iyamna tuna na Wawaya Natusi. <sup>28</sup> Aviyavisina wekarakava avonemi na ke koni deyei. Marana epipisi da raborabobosi kii dogo kamosiyai ma gamona ini yanei, <sup>29</sup> na kii dogo ina kiibutawei. Wawaya iyavo kava bera biibiisi iberabera na ina vomiiiri da yawasa makamakii nonowina ina viiya. Ma iyavo kava berabero iberabera na ina vomiiiri da vitupavira ma wavu ina viiya.”\*

*Bera aroba imamatara kurita da Yesu na iyai.*

<sup>30</sup> “Taku ke kovokovoghina da ina kiku kava bera ana berai. Aviyavisina God ina voneku na ani yanei ma wawaya ani tupaviresi. Ma aku vitupavira na vonavaghata tepanai, iyamna ke taku mani aku kayowana ata berabera ma Wawayina ivonataweku, tuna ina kayowana aberabera.”

<sup>31</sup> “Taku mani ani mamatareku da taku iyai na ke konakovi da aku sisiya na vonavaghata bo kegha. <sup>32</sup> Ma Wawaya sago kubiiku imamatara da taku na iyai ma akovi da ina sisiya na vonavaghata. <sup>33</sup> Ma kana viruwa na ami yonayona wawayisi kovonatawesi Jon Babataito kurina ma tuna vonavaghata ivi mamatarei kurimi.\* <sup>34</sup> Ma wawaya dobuwai ini mamatara kubiiku na ke aku kayowana ghamana. Ma tami kubiimi Jon ivi mamatara na aisisiyei da tami yawasa kota panani. <sup>35</sup> Jon tuna nakanani ma rampa karakaratina ere yaseganina. Ma tami mara tupona nani yaseganina kokayowei da kovi nuwabiibiyeyi. <sup>36</sup> Ma vimamatara kana viaroba idebei da taku na iyai. Ma tuna iyamna irakata kirakai, ke nakanani ma aviyavisina

\* 5:29: Dan 12:2 \* 5:33: Jon 1:19-27, 3:27-30

Jon ivi mamatarei kurimi. Bigasi aku Mamai ivereku da aberaberai na imamatara kubiiku da Mamai ivonataweku. <sup>37</sup> Ma Mamai tuna yavata imamatara kubiiku. Ma kegha da tami ke meyani gamona koti yanei bo maghighina kota kitai, \* <sup>38</sup> ma bade vonana nuwanuwami kamoni ke ita makamakai, iyamna wawayina ivonatawei na ke koti tumaghanei. <sup>39</sup> Tami God vonana kokitakita bubuni iyamna konotanotai da nani kamoni yawasa makamakii nonowina kota viiya. Nani girumisi na taku isisiyeku, <sup>40</sup> ma tami na kobareku. Ke ami kayowana da kota pisi kuriku da yawasa kota viiya.”

<sup>41</sup> “Taku ke ata kayokayowei da wawaya dobuwai ini ghegheniku. <sup>42</sup> Ma akovimi da tami ikikava wawayimi ma bade God nuwanuwana ke kota viiviiya. <sup>43</sup> Aku Mamai ina rewapanai apisi, ma ke kota kayoweku. Ma wawaya wapawapa tuna mani ina rewapanai ita pisi na kota kayowei. <sup>44</sup> Ke kovokovoghina da koni tumaghaneku, iyamna kokayokayowei da tami mani kavakava kamomiyai koni gheghenavivirana. Ma ke kota kayokayowei da God iti gheghenimi, ma tuna ina kina kava na God. <sup>45</sup> Ma ke kona notai da Mamai maghinonai taku ani wavumi, iyamna ami nota kudubina Moses kurina kotereterei na tuna ini wavumi. <sup>46</sup> Mikeda Moses ina giruma koti tumaghanei na bade taku koti tumaghaneku, iyamna ina giruma kamoni na taku ivi sisiyeku. <sup>47</sup> Ma ina giruma ke koti tumaghanei kubiine, ke kovokovoghina da aku sisiya koti tumaghanei.”

## 6

*Yesu wawaya 5 tausan ivi kanisi.  
(Mat 14:13-21; Mak 6:30-44; Luk 9:10-17)*

---

\* 5:37: Mat 3:17; Mak 1:11; Luk 3:22

<sup>1</sup> Muriyai Yesu, Gariri tokana idamani ku nevana. Nani tokana kana vava sago na Taiberiyas. <sup>2</sup> Ma koroto ghamana iverukivini iyamna bera ma matakira wawaya gubagubagisi kurisi iberai na matasiyai ikitai. <sup>3</sup> Yesu ighae da koya baranai kana kivikivina yavata imakiivipika. <sup>4</sup> Ma Jiu damsi i Pasova kamna kana mara namada inenekiibau. <sup>5</sup> Ma Yesu itepa ma ikita da koroto ghamana ipipisi kurina na Piripo ivonei bo, “Meni dobunai parawa tagimari da weni damsi tikanisi?” <sup>6</sup> Nakanani ivi sisiya da Piripo ita rubui, iyamna namada iakovi da aviyavisina ita bera.

<sup>7</sup> Ma Piripo ivonapotei bo, “Te! Ita mane ke kovokovoghina da parawa kata gimari da weni korotona kamoni gisina gisina ita kam. Kana mane ita rakata kirakai. Wawaya nawaravi <sup>8</sup> ita bagibagi na miyiina ke kovokovoghina da parawa nakanani ita gimari.”

<sup>8</sup> Ma kana kivikivina sago, Saimon Pita tina kikei Anduru na ivona bo, <sup>9</sup> “Tomowa kikei weni, tuna bari parawina gisigisisi miikovi ma iyana gisigisisi ruwa gwabinai. Ma koroto irakata kirakai, ke kovokovoghina da tavorereghi.”

<sup>10</sup> Ma Yesu ivona bo, “Wawaya kovonesi da ina makiivipika.” Ma nani dobunai na gawara yagharina ma wawaya peyarisi dimodimo tepanai imakiivipika. Nani korotona kamoni tomotomowa kavakava ivi yavisi na 5 tausan. <sup>11</sup> Yesu parawa iviia ma ivi kiikiwa God kurina ma ivorereghi koroto kurisi. Ma bade iyana nakanani iberai. Ma peyarisi i kayowanai iyuna da ikam. <sup>12</sup> Ikam dododowana na Yesu kana kivikivina ivonesi bo, “Kamteresi koyuna, ke koni rekwei.” <sup>13</sup> Vaghina, kana kivikivina parawa iyuna. Karenai parawa miikovi kava ma damonai wawaya ikam ikovi ma makiiteresi iyuna da kode ivi 12 ivi tupotupo.

<sup>14</sup> Wawaya peyarisi ikitai da Yesu nani matakirina ghamana iberai ma ivi karei da ivivi sisiya bo, “Vonav-aghata, giruma katamana na weni tomowina ivivi sisiyei. Ivona da mara sago peroveta ghamanakina ku dobu ita nekiibau.” <sup>15</sup> Ma Yesu namada iakovi da damsi i kayowana da ita darui da iti kiivavo, tuna kubiine ivomiiri ma ina kina kava ibaba igheme ku koya.

*Yesu okowa tepanai ibaba.*

*(Mat 14:22-33; Mak 6:45-52)*

<sup>16</sup> Namada ravi ipika, ma Yesu kana kivikivina ibaba ioru ku toka, <sup>17</sup> ma ku waka igeru. Toka idamadamani ku Kapeniyam kwanatuna, ma nani kamoni namada ivi didibari. Ma Yesu patana da ke ita nekiibau kurisi. <sup>18</sup> Ma yanunu ghamana iveraverau da ivivi tovatovava. <sup>19</sup> Damsi ivoi inae da kana rabaraba, ruvana na kilomitas miikovi. Ma Yesu ikitai okowa tepanai ibaba ipipisi ku waka na iyabumana kirakai. <sup>20</sup> Tuna kubiine Yesu ivonesi bo, “Taku. Ke kona yabumana.” <sup>21</sup> Ivi yanei ma nuwabi-ibiyai ivi gerui. Ma yaghiyaghina waka mike enenae na nake iwota.

*Wawaya Yesu iekwai.*

<sup>22</sup> Koroto ghamana patana da toka nevanai imakai da mara itom. Ma nota iviyya da raviyai waka sago kava imakamakai na Yesu kana kivikivina kava igeru inae. Ma Yesu na ke ita geru. <sup>23</sup> Damsi ivivi nuwanotanota ma Taiberiyas damsi i waka viya inekiibau. Ma imapatana Bada parawa iviyya, ivi kiikiwa ma wawaya iveresi ikam na nani dobunai wakasi iwota. <sup>24</sup> Maranai koroto nota iviyya da Yesu ma kana kivikivina kegha na igeru nani ku wakasi ma idamana ku Kapeniyam da Yesu itekwai.

*Yesu ivonakiyyaragha da tuna na yawasa vavina.*

<sup>25</sup> Damsi toka nevanai Yesu ipanani ma ivi tarakiiyanei bo, “Bada, avi maranai kunekiibau wike?”

<sup>26</sup> Ma Yesu ivonapotesi bo, “Vonavaghata avonavonemi da ke matakira ghamaghamasi aberai kubiine, ma parawa kokam da kokam dododowana, tuna kubiine koekwekwiku. <sup>27</sup> Ke vavai kava kubiine kona biga iyamna tuna ina bero. Ma vavai sago kubiine koni paparana da kona viiya, tuna na yawasa makamakii nonowina. Ma nani vavina na Wawaya Natusi ina veremi, iyamna rewapana ma matakira Mamai God gwabinai iviia da vavina ina rereghi.”

<sup>28</sup> Ma damsii ivi tarakiiyanei bo, “Ikikava kana berai da God ina kayowana kana votekatekei?”

<sup>29</sup> Ma Yesu ivonapotesi bo, “God ina kayowana na weni. Ina kayowana da wawayina ivonatawei na tuna koni tumaghanei.”

<sup>30</sup> Ma ivi tarakiiyanei bo, “Aviyavisina kuna berai? Avi berana ghamanai kuni matakira da kana kitai ma kani tumaghanem? <sup>31</sup> Akii kaekiki mau warereyai mana ikani. Giruma katamana kamonai evonavona bo, ‘Vavai kunumai ioru, iveresi da ita kam.’ ”\*

<sup>32</sup> Ma Yesu ivonesi bo, “Vonavaghata avonavonemi da nani vavina na ke Moses ita veresi ma kunumai ioru. Ma vavai vaghata na aku Mamai ina veremi. <sup>33</sup> Wawaya sago kunumai ioru ku dobu da yawasa ita veremi ma God ina vavai vaghata na tuna wawayina.”

<sup>34</sup> Ma damsii ivona bo, “Bada, mara nonowa nani vavina kuna vereverekai.”

<sup>35</sup> Ma Yesu ivonakiiyaragha bo, “Yawasa vavina na taku. Wawaya ina pisi kuriku na ke meyani vitonara ina karai, ma iyi ini tumaghaneku na ke meyani kaiyona ina kanakana. <sup>36</sup> Ma namada avonemi, kokitakitiku ma

---

\* 6:31: Exod 16:4, 15; Psa 78:24



kegha da ke koti tumaghaneku. <sup>37</sup> Iyavo kava aku Mamai everevereku na peyarina ina pisi kuriku. Ma iyavo kava ina pisi kuriku na ke meyani ana baresi, <sup>38</sup> iyamna wawayina kunumai ivonataweku aoru ku dobu na tuna ina kayowana ana berai ma ke taku aku kayowanai. <sup>39</sup> Wawayina ivonataweku ina kayowana da wawayi peyarina everevereku na ke sago kava ani wapai. Ma mara damonai ana berisi da rabobowai ina vomiiiri. <sup>40</sup> Aku Mamai ina kayowana da iyavo kava Natuna kurina ekitakita ma itumaghane na kudubisi yawasa makamakii nonowina ina viiya da mara damonai na ana berisi da rabobowai ina vomiiiri.”

<sup>41</sup> Nakanani ivi sisiya na Jiu babadisi ivi karei da ivon-avonakunukunura, iyamna Yesu ivona bo, “Vavai vaghata kunumai ioru na taku.” <sup>42</sup> Damsi ivona bo, “Avi kubiine na ivona da tuna kunumai ioru? Weni tuna na Yesu, Josepa natuna. Ina mamai da ina maduwa takovisi.”

<sup>43</sup> Ma Yesu ivona bo, “Kamomiyai vonakunukunura kovoterei. <sup>44</sup> Aku Mamai ivonataweku, ma iyavo kava ini nuwatinisi na ti kava ina pisi kuriku, da mara damonai ana berai da rabobowai ina vomiiiri. <sup>45</sup> Peroperoveta igiruma bo, ‘God tuna mani wawayi ini beyebeyesi.’ Iyavo kava Mamai iyanei ma gwabinai akova eviiviiya na ina pisi kuriku.\* <sup>46</sup> Ke sago iyai Mamai ita kitai da wawayina God gwabinai ipisi na tuna kava Mamai ikitai. <sup>47</sup> Vonavaghata avonavonemi, iyavo kava ini tumaghaneku na yawasa makamakii nonowina ina viiya. <sup>48</sup> Yawasa vavina na taku. <sup>49</sup> Ami kaekiki mau warere kamonai mana ikani, ma kegha da irukwamakai. <sup>50</sup> Ma vavai kunumai ioru na namada inekiibau wike. Wawayi ina kani na ke ina rukwa. <sup>51</sup> Yawasa vaghata vavina kunumai ioru na taku. Wawayi weni vavina ina kani na ina makii nonowa. Weni vavina

---

\* 6:45: Isa 54:13

na taku viyoku, tuna na yawasa parawina, ana verena da wawaya yawasa vaghata ina panani.”

<sup>52</sup> Ma Jiu babadisi nuwanuwasi ipughu da ti mani kamosiyai ivonavonakunukunura bo, “Ikikava weni to-mowina viyona ina vereta da takani?”

<sup>53</sup> Ma Yesu ivonesi bo, “Vonavaghata avonavonemi da Wawaya Natusi viyona ke kona kani ma tarana ke konu-mai na yawasa gwabimiyai kegha. <sup>54</sup> Iyavo kava viyoku ekanikani ma taraku eumumai na yawasa makamakii nonowina gwabisiyai ma bade mara damonai na ana berai da rabobowai ina vomiiiri, <sup>55</sup> iyamna viyoku na vavai vaghata ma taraku na okowa vaghata. <sup>56</sup> Iyavo kava viyoku ekanikani ma taraku eumumai na mara nonowa yavata tinuwasago. Ma mara nonowa taku na gwabisiyai ma ti bade na gwabikuwai. <sup>57</sup> Yawasa ina Mamai ivonataweku, tuna kubiine taku yawayawaku, bade nakanani iyi viyoku ina kani na gwabikuwai yawasa ina panani. <sup>58</sup> Weni tuna na vavai vaghata kunumai ioru, ma iyi weni vavina ina kani na ina makii nonowa. Ami kaekiki mau na mana ikani ma kegha da irukwamakai.”

<sup>59</sup> Kapeniyam kwanatuna kamonai Yesu weni nakanani ivivi beyebeyena kiki numana kamonai.

*Yawasa makamakii nonowina kana sisiya.*

<sup>60</sup> Iyavo kava Yesu ikivikivini ma weni sisiyina ivi yanei na peyarisu ivona bo, “Weni vibeyebeyena ibagibagi kirakai! Iyi ini vaghinei?”

<sup>61</sup> Yesu damina iviyya da ivonavonakunukunura, tuna kubiine ivonesi bo, “Weni sisiyina iberimi na ami nota ivi beroi, bo? <sup>62</sup> Wawaya Natusi kota kitai ita gheghae kana ku gawara kunona imakamakai nake na ikikava kota notai? <sup>63</sup> Yawasa na God Kanumina evereverena ma wawayota ti mani i rewapana na iyamna kegha. Sisiyisi avi sisiyei kurimi na Kanuma kana sisiya ma

yawasa vaghata evereverena. <sup>64</sup> Ma tami viya ke kota vivitumaghana.” Yesu namada iakovi da meni wawayisi ke ita vivitumaghana ma iyi ini wawanei. <sup>65</sup> Ma ina sisiya ikwapanatini, “Tuna kubiine namada avonemi da ke iyai ina pisi kuriku da kunona Mamai ini vitesi na ina pisi.”

<sup>66</sup> Weni berana murinai na kana kivikivina viya ivi muritina da kivinina ivoterei. <sup>67</sup> Ma kana kivikivina ivi 12 ivonesi bo, “Ma tami na ikikava, ami kayowana bade kona votereku, bo?”

<sup>68</sup> Ma Saimon Pita ivonapotei bo, “Bada, iyi kurina kata nae? Yawasa makamakii nonowina kana sisiya na tam kava gwabimuwai.\* <sup>69</sup> Kaitumaghanem ma kakovim da tam na God ina Wawaya Vovokaravim.”

<sup>70</sup> Ma Yesu ivonapotei bo, “Taku ami vi 12 avinemi. Ma kegha da kamomiyai wawaya sago tuna na Devil ina wawaya.” <sup>71</sup> Yesu na Judas ivi sisiyei, tuna Saimon Iskariyot natuna. Tuna na kana kivikivina ivi 12 kamosiya ma kegha da mara epipisi da ini wawanei.

## 7

### *Yesu ma titina yoghoyogho.*

<sup>1</sup> Nani berasi murinai Yesu Gariri dobuna kamonai ibababa. Ke ita kayokayowei da ita nae ku Judiya iyamna iakovi da Jiu babadisi nani dobunai ikayokayowei da iti raboboi. <sup>2</sup> Ma Jiu damsi i kam ghamana sago kana vava Yobe.\* Ma marana iututuriyariya na <sup>3</sup> Yesu titina yoghoyogho kurina ivona bo, “Tam weni paratina kuta voterei da kuta nae ku Judiya, da nani dobunai bera ghamaghamasi kuta berai da iyavo kava ekivikivininim na ita kitai. <sup>4</sup> Wawaya iyi ekayokayowei da iti wawayaghama

---

\* 6:68: Mat 16:16; Mak 8:29; Luk 9:20      \* 7:2: Lev 23:34; Deut 16:13

na ina bera ke gavunai ina berai. Ma tam weni berasi keberaberai na kuti debe meyem koroto ghamana kurisi.”<sup>5</sup> Titina yoghoyogho vaghata ma kegha da ke ita vivitumaghanei.

<sup>6</sup> Ma Yesu ivonesi bo, “Aku mara vaghata na ke ita nekiibau. Ma tami mara wapawapa na ami mara.<sup>7</sup> Tami na wawaya ke ita vivikawapatemi ma taku na ikawapateku, iyamna avonavonesi da aviyavisina dobuwai eberaberai na berona.<sup>8</sup> Tuna kubiine tami koghae Yobe kamna kubiine, ma taku na karakava ana ghae, iyamna aku mara vaghata na ke ita nekiibau.”<sup>9</sup> Weni nakanani ivi sisiya ikovi ma tuna Gariri dobuna kamonai imakai.

*Yesu Taparoro Numana garina kamonai ivi beyebeyena.*

<sup>10</sup> Yesu titina yoghoyogho ivi neyana Yobe kamna kubiine ma tuna bade murisiyai inae na ke debiiyai ma gavunai.<sup>11</sup> Ma kamna kamonai na Jiu damsi i babada Yesu ikitakitekwekwai ma ivivi tarakiikiyana bo, “Nani tomowina na imapatana?”

<sup>12</sup> Ma nani korotona kamonai na wawaya Yesu ivivi sisiyakarakaravei. Viya ivona bo, “Tuna tomowa biibiina.” Ma viya ivonapotesi bo, “Kegha, tuna wawaya iberoberowesi.”<sup>13</sup> Ma ke sago wawaya iyai debiiyai iti sisiyei, iyamna Jiu babadisi iyabuyabumanesi.

<sup>14</sup> Ma Yobe kamna borinai na Yesu ighae da Taparoro Numana garina kamonai vibeyebeyena ivi karei.<sup>15</sup> Jiu babadisi ivi deyei ma ivi tarakiyana bo, “Weni tomowina na ke ita giruma ma ikikava da iakova kirakai?”

<sup>16</sup> Yesu ivonapotesi bo, “Aku vibeyebeyena na ke taku mani aku nuwagiurai. Ma wawayina ivonataweku na tuna gwabinai akova aviiyiya da aibeyebeyena.<sup>17</sup> Wawaya iyai ekayokayowei da God ina kayowana ina berai, tuna wawayina evi nuwanotanota da aku vibeyebeyena na God

gwabinai epipisi bo taku mani aku kayowanai aisisiya.<sup>18</sup> Meni wawayina tuna mani ina notiyai isisiya na eber-  
 aberai da wawayi ini ghegheni. Ma meni wawayina ina  
 bada ikikava ivi varavarai na nununai ibeyebeyena da ina  
 bada kana vigheghena kubiine, tuna na wawayi manin-  
 ina, vibero gwabinai kegha.<sup>19</sup> Moses ina vonaviyoyovana  
 iveremi ma ke sago wawayi ita nunuri. Ma avi kubiine  
 koberabera tovonni da kona kiivunuku?”

<sup>20</sup> Ma koroto ivonapotei bo, “Tam kanuma berona  
 itowatepanim. Ke sago iyi ita kayokayowei da  
 ina kiivunum.”

<sup>21</sup> Ma Yesu ivonapotesi bo, “Taku bera ghamana sago  
 viyakam maranai aberai da kotataghana. <sup>22</sup> Ma Moses  
 ivonemi da kwimata bekami kota tuviviratawei. Ma vona  
 bubuna da ke Moses gwabinai ita pisi ma ami kaekiki mau  
 gwabisiyai. Mara viya na viyakam marasiyai tomotomowa  
 gisigisi kwimata bekasi kotutuviviratawei.\* <sup>23</sup> Tuna  
 kubiine na tomotomowa gisigisi viyakam marasiyai  
 kotutuviviratawei na Moses ina vonaviyoyovana ke  
 kota vivikiigiyyei. Ma avi kubiine nuwanuwami ipughu  
 kuriku maranai tomowa tupuwina kudubina avi yawasi  
 viyakam maranai?\*" <sup>24</sup> Ke bera kona kitai ma wekarakava  
 nota kona viiya. Bera iyamna vaghata konekwai na  
 konakovi da avonavona bubuna.”

*Yesu na God ina Vivinevine Wawayina bo kegha.*

<sup>25</sup> Ma nani kamonai Jerusalem damsi viya ivi karei da  
 ivivi tarakiyana bo, “Wena vaghina tomowina, bo? Tuna  
 babada ipaparanei da ina kiivunui, bo? <sup>26</sup> Karako na debi-  
 iyai isisiya ma ke sago iyai ita vivighevuvuranei. Mikeda  
 ita babada enotanotai da tuna na God ina Vivinevine  
 Wawayina. <sup>27</sup> Ma kegha da weni tomowina na ina dobu

\* 7:22: Gen 17:10; Lev 12:3 \* 7:23: Jon 5:9

takovi. Ma God ina Vivinevine Wawayina vaghata ina pisi na ke sago wawayia inakovi da tuna imapatana ina pisi.”

<sup>28</sup> Ma Yesu patana da ivivi beyebeyena Taparoro Numana garina kamonai ma ikiirara bo, “Vonavaghata da koakoviku da taku iyai ma bade koakovi da mimei apisi. Ke taku mani aku kayowanai ata pisi. Ma wawayina ivonataweku na wawayia maninina ma tami ke kotakovi. <sup>29</sup> Ma taku na akovi, iyamna tuna gwabinai apisi, tuna ivonataweku.”

<sup>30</sup> Weni sisiyisi kubiine na babada ibera tovonni da Yesu ita votatani, ma ke kovokovoghina, iyamna ina mara ke ita nekiibau. <sup>31</sup> Ma koroto kamonai na wawayia ipeyari i vitumaghana Yesu kurina iterei. Ma ivivi sisiyei, ivonavona bo, “Vonavaghata, weni tomowina na God ina Vivinevine Wawayina, iyamna ikikava tanotanotai da Keriso matakira ghamaghamasi ita berai na weni tomowina peyarina eberaberai.”

*Potapota wawayisi inae da Yesu ita paniya.*

<sup>32</sup> Perisi damsi ivi yanei da nani korotona ghamana Yesu ina bera ivivi sisiyakarakaravei na taparoro babadisi i babada yavata Taparoro Numana kana potapota ivonatawesi da Yesu ita paniya. <sup>33</sup> Ma kegha da Yesu ivona bo, “Taku aku mara na tupo vaghina da tami yavata tamakai, ma muriyai na ana vovira wawayina ivonataweku kurina. <sup>34</sup> Kona kitaekwekwiku ma ke kona pananiku, ma mike ana nae na ke kovokovoghina da nake kona nae.”

<sup>35</sup> Ma Jiu babadisi ti mani kamosiyai ivivi sisiya bo, “Weni tomowina mike ekayokayowei da ina nae? Ma avi kubiine ke tapanani? Mikeda ina nae da ita wawayia ivi verubogebogesi Grik damsi kamosiyai imakiiyana na kurisi da ini beyebeyesi.”

<sup>36</sup> “Avi kubiine ivona bo, ‘Kona kitaekwekwiku ma ke kona pananiku, ma mike ana nae na ke kovokovoghina da nake kona nae?’ ”

*Okowa yawayawana.*

<sup>37</sup> Ma Yobe kamna ina mara turina inekiibau, tuna na mara ghamana nani kamna kamonai. Ma Yesu ivomiiri ma ikiirara bo, “Wawaya iyai kaiyona ina kanakana na ina pisi da gwabikuwai inuma.\* <sup>38</sup> Wawaya iyai ini tumaghaneku na giruma katamana evonavona bo, ‘Okowa yawayawana gwabinai ina vusivusira.’ ”\* <sup>39</sup> Yesu weni sisiyina iterei iyamna iyavo kava itumaghaneɪ na karakava Kanuma Vovokaravina ina viiya. Ma nani maranai na Kanumina ke ita veresi, iyamna Yesu ke ita voepai kana ku kadara.

*Wawaya ivi bogebogesi.*

<sup>40</sup> Ma wawaya weni sisiyina ivivi yanei na viya ivona bo, “Vonavaghata weni tomowina na ita peroveta ghamana.”

<sup>41</sup> Ma wawaya viya ivona bo, “Tuna na Keriso, God ina Vivinevine Wawayina.”

Ma viya ivona bo, “Ikikava da tuna God ina Vivinevine Wawayina? Ina dobu na Gariri. <sup>42</sup> Ma giruma katamana evonavona da Keriso na Beteliyem kamonai ina tupuwa, iyamna tuna kwanatuna na Kiivavo David ina dobu. Ma evonavona da Keriso na David ina rakaraka kamonai.”\*

<sup>43</sup> Wawaya nakanani Yesu ivivi sisiyei na ivi bogebogesi.

<sup>44</sup> Ma viya i kayowana da ita votatani ma ke sago iyai imana ku bekana ita terei.

*Jiu babadisi Yesu ke iti tumaghaneɪ.*

<sup>45</sup> Taparoro Numana kana potapota ivovira taparoro babadisi i babada ma Perisi damsi kurisi. Ma babadisi iyeghisi bo, “Avi kubiine Yesu ke kota rutinaruwei?”

---

\* 7:37: Lev 23:36 \* 7:38: Ezek 47:1; Zech 14:8 \* 7:42: 2Sam 7:12; Mic 5:2

<sup>46</sup> Ma potapota wawayisi ivonapotesi bo, “Nani tomowina ivivi sisiya na ke sago wawaya iyai nakanani iti sisiya.”

<sup>47</sup> Ma Perisi damsı iyeghisi. “Tami bade ina sisiya viberowai da nuwanuwami itinavirai, bo? <sup>48</sup> Ma tokai ami babada ma Perisi damkai Yesu kaitumaghaneı, bo? Ke sago tovana. <sup>49</sup> Nani korotona na neghaneghası, Moses ina vonaviyoyovana ke itakova bubuni, tuna kubiine God imagisi.”

<sup>50</sup> Ma Perisi sago kana vava Nikodimas, tuna namada inae da Yesu yavata ivi sisiya na ivonesi bo, \* <sup>51</sup> “Ita vonaviyoyovana ivona da kunona wawaya ina sisiya tiyaneı ma tapanani da aviyavisina iberai ma muriyai ku berona taterei.”

<sup>52</sup> Ma ivonapoteı bo, “Tam yavata Gariri wawaya bo? Giruma katamana kekitai ma kuna panani da ke sago peroveta Gariri kamonai ina kiibau.”

<sup>53</sup> Ma vaghina, peyarisi nani gawarina ikuyowei ma ivovira i ku numa.

## 8

### *Wavine ivi pekana wapawapa na ipanani.*

[<sup>1</sup> Yesu ighae ku Oliv koyana. <sup>2</sup> Ma mara boiboiyai ivovirame da Taparoro Numana garina kamonai ivi kiimakiyeyi ma wawaya peyarisi iriyeyi kurina da ivivi beyebeyesi. <sup>3</sup> Ma vonaviyoyovana vibeyebeyena wawayisi ma Perisi damsı, wavine sago irutinapiyeyi da koroto maghinosiyai ivi miirini. Wavinena na ivi pekana wapawapa, tomowa sago ke kawana vaghata ma yavata ivivi pekana na wawaya ipanani. <sup>4</sup> Ma ivona bo, “Bada, weni wavinena kapanani da ivivi pekana wapawapa. <sup>5</sup> Moses ina vonaviyoyovana kamonai igiruma da wivine weni nakanani bera ina bera beroyi na wakimiyai kata kiivunusi. Ma tam, am

---

\* 7:50: Jon 3:1-2



nota na ikikava?”\* <sup>6</sup> Weni vitarakiiyanina iterei da Yesu iti sisiya bero na iti wavui. Ma kegha da Yesu itawopika ma ivi karei da dowiyai imarakorakonai ivivi girugiruma. <sup>7</sup> Ma wawayisi patana da ivivi tarakiiyane. Tuna kubiine Yesu ivomiiri ma ivonesi bo, “Tam iyai ke meyani berabero kuta berai na kevi karei da weni wavinena wakimiyai kuna ravi.” <sup>8</sup> Vaghina ma itawopikame da dowiyai ivivi girugiruma. <sup>9</sup> Ma wawayisi weni sisiyina ivi yane na ivi karei da sago sago duma inae. Magu-magurisi ivi nao, da peyarisi Yesu ikuyowei. Ma wavinena na patana da imiimiiri. <sup>10</sup> Yesu ivomiiri ma nani wavinena ivi tarakiiyane bo, “Wavine, wawayisi ivivi wavum na mike ivi neyana? Wawaya sago ku berona iterem, bo kegha?”

<sup>11</sup> Ma wavinena ivona bo, “Bada, ke sago iyai.”

Ma vaghina, Yesu ivonei bo, “Taku bade nakanani, ke ku berona ana terem. Kenae, ma berabero ke kuna bera meyei.”]\*

*Yesu na dobu kana yasegana.*

<sup>12</sup> Yesu ivi karei da koroto kurisi ivi sisiya na ivonesi bo, “Taku na dobu kana yasegana. Wawaya ina kiviniku na ke meyani nubakutuvai ina baba, ma nani yaseganinai na yawasa vaghata ina panani.”\*

<sup>13</sup> Ma Perisi damsi ivonapotei bo, “Kibero. Tam mani kisisiya meyem ma ke sago wawaya ku murim ita miiri da iti sisiya kubiim, tuna kubiine aviyavisina kuvonei na iyamna kegha.”\*

<sup>14</sup> Ma Yesu ivonapotesi bo, “Taku mani aisisiya meyeku, ma kegha da aku sisiya na vonavaghata, iyamna taku akovi

---

\* 8:5: Lev 20:10; Deut 22:22-24      \* 8:11: Mara katamaninai giruma damsi  
 viya vesis 8:1-11 ke ita terei.      \* 8:12: Mat 5:14; Jon 9:5      \* 8:13: Jon 5:31

da imapatana apisi ma mike ana nae. Ma tami na ke kotakovi. <sup>15</sup> Tami mani ami akova tepanai da koitupavireku. Ma taku na ke sago wawaya ati tupavirei. <sup>16</sup> Mikeda ati tupavira ma ata vonakiiyaragha da wawaya ibera beroi na nani kamoni aku nota na maninina kavakava, iyamna taku na ke ina kiku kava. Aku Mamai ivonataweku na tuna gwabikuwai. <sup>17</sup> Ami vonaviyoyovana kamoni igirumi da wawaya ruwa sisiyina sago ini mamatarei na tuna vonavaghata.\* <sup>18</sup> Taku mani kubiiku aisisiya ma kaku viruwa na aku Mamai, tuna ivonataweku.”

<sup>19</sup> Ma ivi tarakiiyane bo, “Am mamai na imapatana?”

Yesu ivonapotesi bo, “Tami ke kotakovi da taku iyai ma bade aku Mamai ke kotakovi. Kotakoviku na aku Mamai kotakovi.”

<sup>20</sup> Yesu weni sisiyisi ivi sisiyei Taparoro Numana garina kamoni. Gawara sago imakamakai da wawaya i verena itutura ma nani gawarinai Yesu ivivi beyebeyena. Ma ke sago wawaya ita votatani, iyamna kana mara ke ita nekiibau.

*Yesu ivonesi bo, “Mike ana nae na ke kovokovoghina da nake kona nae.”*

<sup>21</sup> Ma Yesu ivona meyesi bo, “Taku ana nekuyowemi da tami konekwa kaviku, ma ami bera beroberosi kamoni kona rukwa. Mike ana nae na tami ke kovokovoghina da nake kona nae.”

<sup>22</sup> Ma Jiu babadisi ti mani ivivi tarakiikiyana meyesi, “Tuna mani ini rabobo meyei bo? Mikeda tuna kubiine ivona da, ‘Mike ana nae na tami ke kovokovoghina da nake kona nae.’”

<sup>23</sup> Ma Yesu ina sisiya ikwapanatini, “Tami na weni dobuna wawayimi, ma taku na kiidamo wawayiku. Tami ami dobu weni, ma taku na kegha. <sup>24</sup> Tuna kubiine avonemi da ami bera beroberosi kubiine kona rukwa.

---

\* 8:17: Deut 19:15

Namada avonemi da taku iyai. Ke koni tumaghaneku na vaghina, ami bera beroberosi kubiine kona rukwa.”

<sup>25</sup> Ma ivi tarakiiyanei bo, “Tam iyai?”

Ma ivonapotesi bo, “Taku, mara nonowa avonavonemi.

<sup>26</sup> Ami bera ipeyari kirakai da ati sisiyei ma bade ati tupaviremi ma ata vonakiiyaragha da berabero koberai ma kegha. Wawayina ivonataweku na tuna vonavaghata wawayina. Ma aviyavisina gwabinai aiyanei na tuna kava wawayavononesi.”

<sup>27</sup> Ma ti damsi na ke itakovi da ina Mamai ivivi sisiyei.

<sup>28</sup> Tuna kubiine Yesu ivona bo, “Taku Wawayaya Natusi kona voepiiku na konakovi da taku iyai. Ma ke taku mani aku kayowana ata berabera, ma aku Mamai ikikava ivi beyebeyeku na nakanani aisisiya. <sup>29</sup> Wawayina ivonataweku na gwabikuwai. Ke ita kuyoweku, iyamna ina kayowana aberabera.”

<sup>30</sup> Yesu weni sisiyisi itereterei na wawayaya peyarisi i vitumaghana kurina iterei.

*Vonavaghata ina votawemi.*

<sup>31</sup> Ma Jiu damsi iyavo kava Yesu ivi tumaghane na ivonesi bo, “Aku vibeyebeyena kona vatekatekei na tami na kaku kivikivina vaghata. <sup>32</sup> Vonavaghata konakovi na nani vonavaghatina gabura kamoni ina votawemi.”

<sup>33</sup> Ma Jiu babadisi ivonapotei bo, “Tokai na Abraham tupurereghina. Ma ke meyani ita patumikai bo kati sleiv. Avi kubiine kuvona da ita votawekai?”\*

<sup>34</sup> Ma Yesu ivonapotesi bo, “Vonavaghata avonavonemi, tam iyai berabero keberabera na am bera beroberosi ipatumim da kuvi sleiv. <sup>35</sup> Ma takovi da wawayaya natuna ina rakaraka kamosiyai na ina gawara mara nonowa emakamakai. Ma sleiv na ke ina makii nonowa nani

---

\* 8:33: Mat 3:9; Luk 3:8

rakarakana kamosiyai, iyamna ke ina rakaraka vaghata. <sup>36</sup> Ma Wawaya Natusi ini yawasimi ma ina votawemi na ina votawe tuwanonowimi. <sup>37</sup> Akovi da tami na Abraham tupurereghina. Ma ke mara gurina na koni raboboku, iyamna aku sisiya ke kota vivitumaghanei. <sup>38</sup> Aviyavisina aku Mamai ivi debei kuriku na avonavonemi, ma tami na aviyavisina ami mamai gwabinai kovi yanei na koberaberai.”

<sup>39</sup> Ma ivonapotei bo, “Akii mamai na Abraham.”

Ma Yesu ivona bo, “Mikeda tami Abraham tupurereghina na aviyavisina Abraham iberai na nani berasi kota beraberai. <sup>40</sup> Aviyavisina God gwabinai avi yanei na vonavaghata ma tuna avonavonemi. Ma kegha da tami kokayokayowei da kona kiivunuku. Ma Abraham ke nakanani ita berai. <sup>41</sup> Ikikava ami mamai berabero eberaberai na tami bade nakanani koberaberai.”

Ma ivonapotei bo, “Tokai na ke deba wawaya. God ina kina kava na akii Mamai ma tokai na natunatuna vaghata.”

<sup>42</sup> Ma Yesu ivonapotesi bo, “Mikeda God na ami Mamai na nuwanuwaku kota viiya, iyamna God gwabinai apisi, tuna ivonataweku. Ma ke taku mani aku kayowanai ata pisi. <sup>43</sup> Avi kubiine aku sisiya ke kota viviyanei? Iyamna na weni. Tami ke ruvaruvami da aku sisiya konakova bubuni. <sup>44</sup> Tami ami mamai na Devil, ma kokayokayowei da tuna ina kayowana kona berai. Dobu karenai da ku karako, tuna na kiivunuwa wawayina. Ma bade vonavaghata ke ita kayokayowei, iyamna vonavaghata gwabinai kegha. Maranai ini bero na tuna ina yawasa vaghata ekivikivini, iyamna tuna na viviberona, ma tuna na vibero ina mamai. <sup>45</sup> Ma taku na vonavaghata aisisiyei tuna kubiine ke kota vivitumaghaneku. <sup>46</sup> Kamomiyai wawaya sago kovokovoghina da ita vona da taku berabero aberai bo kegha? Ke kovokovoghina. Vonavaghata avonavonemi

ma avi kubiine ke kota vivitumaghaneku? <sup>47</sup> Iyi God rapenai na God ina sisiya iyanei. Ma tami na ke God ina wawaya, tuna kubiine ke kota viviyana.”

*Yesu ma Abraham.*

<sup>48</sup> Ma Jiu babadisi Yesu kurina ivona bo, “Vonavaghata kavonavonei da tam na Sameriya wawayim ma kanuma berona gwabimuwai irunuma.”

<sup>49</sup> Ma Yesu ivona bo, “Kanuma berona ke gwabikuwai. Ma taku na aku Mamai avovokaravei. Ma tami na kokiikiiviberoku. <sup>50</sup> Ke taku mani kaku vigheghena atekwekwai ma wawaya sago ina kayowana da wawaya ini ghegheniku. Ma tuna na vitupavira badana ma ina nota na maninina kavakava. <sup>51</sup> Ma vonavaghata avon-avonemi da wawaya iyai vonaku ina votekatekei na tuna rabobo ke ina panani.”

<sup>52</sup> Ma Jiu damsi ivonapotei bo, “Wekarakava kakovi da tam kanuma berona itowatepanim. Abraham irabobo ma bade peroperoveta nakanani. Ma tam kuvona da wawaya vonam ina votekatekei na rabobo ke ina panani. <sup>53</sup> Akii mamai Abraham kughekuyowei bo? Kegha taweyana. Ma tuna irabobo ma bade peroperoveta nakanani. Ma tam na iyai?”

<sup>54</sup> Ma Yesu ivonapotesi bo, “Mikeda taku mani ati gheghena meyeku da kaku kadara ita rakata na nani vigheghenina na iyamna kegha. Aku Mamai, tuna kava ini ghegheniku. Ma tami na kovonavonei da tuna na ami God. <sup>55</sup> Ma kegha, tami God ke kotakovi, ma taku na akovi. Mikeda ata vona da ke atakovi na taku wawaya viviberoku nakanani ma tami. Ma taku God akovi, tuna kubiine vonana avovotekatekei. <sup>56</sup> Ami mamai Abraham ivi nuwabiibii kirakai da mara sago aku nekiibau marana ita kitai. Ma ikitai na ivi nuwabiibai.”

<sup>57</sup> Ma Jiu damsi ivonei bo, “Tam karakava kam madegha ini 50 ma kuvona da Abraham kukitai.”

<sup>58</sup> Yesu ivona bo, “Vonavaghata avonavonemi muriyai da Abraham ita tupuwa na taku namada amakamakai.”

<sup>59</sup> Weni sisiyina kubiine wakima iyuna da ita ravi, ma Yesu koroto kamonai ionagha da Taparoro Numana garina ikiibutawei inae.

## 9

*Yesu tomowa matapotapotana ivi yawasi.*

<sup>1</sup> Yesu ibaba inenae na tomowa sago ikitai, itupuwa da matapotapotana. <sup>2</sup> Ma Yesu kana kivikivina ivi tarakiiyane bo, “Bada, iyi ina berabero da weni wawayina itupuwa da matapotapotana? Tuna mani bo ina mamai da ina maduwa?”

<sup>3</sup> Ma Yesu ivonapotesi bo, “Ke tuna, ma ke ina mamai da ina maduwa wavu ina viiya. Tuna matana ipota da God ina rewapana gwabinai ina rudeba da wawayi ina kitai. <sup>4</sup>Taku na God ivonataweku ma ina biga na mariyai taberai. Ma didibara epipisi na nani kamonai ke kovokovoghina da wawayi ina biga. <sup>5</sup>Wekarakava taku dobuwai amakamakai na taku na dobu kana yasegana.”\*

<sup>6</sup> Ivi sisiya ikovi ma ikanu ku dowa, ma kanuna dowa yavata ivoviravirai da ivi dobodobo. Ma iviyya da tomowina matana ipasiya. <sup>7</sup> Ma ivonei bo, “Kenae ku toka kana vava Silowam da maghighim kuna kowai.” Silowam iyamna ‘Vonatawei.’ Ma tomowina inae matana ikowai da iyawasa. Ma ere kitakitana ivovira ina ku numa.

<sup>8</sup> Turaturana ma bade wawayi viya tomowina iakovi da mara nonowa vinowi tepanai imakamakai na ivi tarakiiyana bo, “Weni na vaghina tomowina mara nonowa ivivi nowi bo?”

---

\* 9:5: Mat 5:14; Jon 8:12

<sup>9</sup> Ma wawaya viya ivona da vaghina wawayina, ma viya ivona da kegha, kana kita da maghimaghghina.

Ma tomowina tuna mani ivi sisiya bo, “Taku na vaghina wawayiku.”

<sup>10</sup> Damsi ivi tarakiiyane bo, “Ma ikikava na kekitakita?”

<sup>11</sup> Ma ivonapotesi bo, “Tomowa kana vava Yesu do-bodobo ivoviravirai ma matakun ipasini ma ivoneku bo, ‘Kenae ku Silowam ma matam kuna kowai.’ Ma anae akowai da akitakita.”

<sup>12</sup> Ma ivi tarakiiyane bo, “Tomowina na imapatana?”  
Ivonapotesi bo, “Ke atakovi.”

*Perisi damsidi matapotapotana ivi tupaviravirei.*

<sup>13-14</sup> Ma tuna na viyakam marana kamoni ma Yesu do-bodobo iviyya da tomowina matana ivi yawasi. Tuna kubiine wawaya tomowina irutinapiyei Perisi damsidi kurisi.  
<sup>15</sup> Ma ti bade tomowina ivi tarakiiyane da ikikava matana ikita. Tomowina ivona bo, “Yesu do-bodobo ku matakun ipasiya ma akowai na akita.”

<sup>16</sup> Ma Perisi damsidi viya ivona bo, “Yesu na ke God gwabinai ita pisi, iyamna viyakam marana ke ita vovokaravei.”

Ma viya ivona bo, “Berabero wawayina na ke kovovoghina da matakira ghamaghamasi ita berai.” Tuna kubiine Perisi damsidi ti mani kamosiyyai ivi bogebogesi.

<sup>17</sup> Ma Perisi damsidi tomowina ivi tarakiiyana meye bo, “Ma tam ivi yawasim na tam am nota na tuna iyai?”

Ma tomowina ivonapotesi bo, “Anotanotai da tuna na God ina peroveta.”

<sup>18</sup> Ma Jiu babadisi patana da ke iti tumaghane da tuna itupuwa da matapotapotana ma wekarakava na ekitakita. Tuna kubiine ina mamai ma ina maduwa kii sisiya ivonatawei da ipisi. <sup>19</sup> Ma ivi tarakiiyane bo, “Weni tomowina na tami natumi, itupuwa da matapotapotana bo kegha? Ma ikikava da wekarakava na ekitakita?”

<sup>20</sup> Ma ina maduwa da ina mamai ivonapotesi bo, “Kakovi da tuna na natukai, ma vonavaghata da itupuwa da matapotapotana. <sup>21</sup> Ma ikikava da ekitakita ma iyi matana ivi yawasi na ke katakovi. Kovi tarakiiyanei da tuna mani ini sisiya, tuna magurina.” <sup>22</sup> Ina maduwa da ina mamai weni nakanani ivonesi, iyamna iyabumana. Iakovi da Jiu babadisi namada sisiya iterei da iyavo kava ini tumaghana da Yesu na God ina Vivinevine Wawayina na kiki numanai ini kiibunisi. <sup>23</sup> Tuna kubiine ivonesi bo, “Kovi tarakiiyanei, tuna magurina.”

<sup>24</sup> Ma mara kana viruwa tomowina ivonei da ipisi. Ma ivonei bo, “God ku matana vonavaghata kevi sisiyei. Kakovi da Yesu na berabero wawayina.”

<sup>25</sup> Tomowina ivonapotesi bo, “Ke atakovi da tuna berabero wawayina bo kegha. Ma akovi da mataku ipota ma wekarakava na akitakita.”

<sup>26</sup> Ma ivi tarakiiyanei bo, “Ikikava iberim da matam ikita?”

<sup>27</sup> Ma ivonapotesi bo, “Namada avonemi ma ke koti yaneku. Ma avi kubiine kokayokayowei da koni yana meyei? Mikeda tami bade kokayokayowei da kona kivini bo?”

<sup>28</sup> Nakanani ivi sisiya na Jiu babadisi ivi avaberowei ma ivonei bo, “Tam na Yesu kana kivikivina, ma tokai na kegha. Tokai na Moses kana kivikivina. <sup>29</sup> Kakovi da God na Moses kurina ivi sisiya ma nani tomowina Yesu na ke katakovi da mimei ipisi.”

<sup>30</sup> Ma tomowina ivonapotesi bo, “Avi deyei da tami ke kotakovi da mimei ipisi ma kegha da mataku ivi yawasi. <sup>31</sup> Peyarita takovi da God na berabero wawayisi ke ita viviyanesi. Ma wawaya maninisi kava ina kayowana eberaberi na ti damsi iyanesi. <sup>32</sup> Ke meyani wawaya ita tupuwa da matapotapotana ma muriyai da ita kita. Weni berana na karako da itupuwa. <sup>33</sup> Mikeda Yesu



ke God gwabinai ita pisi na ke kovokovoghina da bera ghamaghamasi ita berai.”

<sup>34</sup> Ma ivonapotei bo, “Tam na berabero kamona ku-tupuwa da kumagura. Ma avi kubiine kekayokayowei da kuti beyebeyekai?” Ma vaghina Perisi damsi nani tomowina kiki numana kamona ivi kiibuni.

*Kanuma ina ku nevanewa wawayata matasi ipota.*

<sup>35</sup> Yesu ivi yanei da tomowina ikwavini ikiibau na iekwai da ipanani. Ma ivonei bo, “Wawayata Natusi kitumaghane bo kegha?”

<sup>36</sup> Tomowina ivi tarakiyanei bo, “Bada, tuna na iyai? Kevona bubuniku da taku ani tumaghane.”

<sup>37</sup> Ma Yesu ivona bo, “Wekarakava wawayina kekitakitai ma yavata kosisiya.”

<sup>38</sup> Ma tomowina ivona bo, “Bada, aitumaghana.” Ma ivokavakavari.

<sup>39</sup> Ma Yesu ivona bo, “Apisi ku dobu da wawayata ani tupaviresi. Ma bade apisi da wawayata matapotapotasi na ina kita ma iyavo kava ekitakita na matasi ina pota.”

<sup>40</sup> Weni sisiyina ikaratawei na Perisi damsi viya ivi yanei. Ma ivi tarakiyanei bo, “Aviyavisina kisisiyei? Kevonavona da tokai yavata mataki ipota bo?”

<sup>41</sup> Ma Yesu ivona bo, “Mikeda matami ita pota na ami berabero wavuna kegha. Ma kovonavona da kokitakita, tuna kubiine ami berabero wavuna emakamakai.”

## 10

*Sipu kii koyakoyagha miibiina.*

<sup>1</sup> Yesu ivona bo, “Vonavaghata avonavonemi, meni wawayina ina votete da sipu garina ku kamona ina rui na tuna yapiyapi wawayina, iyamna ke matuketiyai ita rui.

<sup>2</sup> Ma sipu kii koyakoyagha na garina kana matuketiyai ina rui, ma tuna wawayina na kii koyakoyagha vaghata.

<sup>3</sup> Ma gari kana potapota wawayina emakamakai ma tuna matuketa ina votawei da sipu kii koyakoyagha ina rui. Ma sipu sago sago duma kii vava ina kwatui ma ti na gamona ini yanei ma ina kivini da ina kiibau. <sup>4</sup> Tuna mani ina sipu rapenai ina rutinakiibuwesi ma ini nowesi ina nae. Ti na i mamai ekivikivini, iyamna gamona iakovi. <sup>5</sup> Ma ke kovokovoghina wawayaya viruwa ina kivini. Wawayina ina barei ma ina verukuyowei, iyamna gamona ke itakovi.”

<sup>6</sup> Yesu weni miibiina ivi sisiyei kurisi ma damsii iyamna ke itakovi.

*Yesu na sipu kii koyakoyagha biibiina.*

<sup>7</sup> Tuna kubiine Yesu ivona meyesi bo, “Vonavaghata avonavonemi, sipu kii matuketa na taku. <sup>8</sup> Iyavo kava maghinokuwai ipisi na yapiyapi wawayisi, nani kubiine sipu gamosi ke ita votekatekei. <sup>9</sup> Taku na matuketa. Wawayaya iyi gwabikuwai ina rui na yawasa ina panani da ina makai bubuna. Nakanani ma sipu, kii gari matuketinai erurui ma ekiikiibau da kii rai ma kii okowa biibiina epanapanani. <sup>10</sup> Yapiyapi wawayina ina pisi da yapi, kiivunuwa ma kiivibero ina berai. Ma taku apisi da tami yawasa biibiina kudubina kona vii yavui.”

<sup>11</sup> “Taku na sipu kii koyakoyagha biibiiku. Ma koyakoyagha wawayina biibiina na ina yawasa ina vere meyei da ina sipu kubiisi ina rabobo. <sup>12</sup> Ma mikeda sipu i mamai bigabiga sago ini miyei da sipu ina koyaghisi na bigabiga wawayina ke nuwanuwana kudubinai ina koyaghisi, iyamna nani sipusi ke rapenai. Tuna kubiine bigabiga ina kitai da kukou dipa kayakayayina epipisi na sipu ina verukuyowesi. Ma kukou dipa sipu viya ini kutavunuwana ma viya ina rukwavinisi da ini verubogebogesi. <sup>13</sup> Bigabiga wawayina ina verau, iyamna tuna wawayaya wapawapa, ke sipu kii koyakoyagha

vaghata da iti nuwapoyesi. <sup>14-15</sup> Taku na koyakoyagha biibiiku. Ikiava aku Mamai iakoviku ma Mamai akovi, nakanani aku sipu akovisi ma iakoviku. Ma aku yawasa ana verena da ana rabobo aku sipu kubiisi.\* <sup>16</sup> Ma sipu viya rapekuwai na ke weni yavona kamoni. Ana rutinisi da weni garina ku kamona ina rui da ini kiisagosi ma kii koyakoyagha na sago kava.”

<sup>17</sup> “Aku Mamai ina nuwaviina na taku, iyamna avi vaghinei da aku yawasa ana verena da ana rabobo. Ma muriyai aku yawasa ana vii meyei. <sup>18</sup> Aku rewapana emakamakai da aku yawasa ana verena ma bade ana vii meyei. Ke sago iyi ina rewapana ita makamakai da aku yawasa ina viitawei. Kegha, aku kayowanai ana verena. Aku Mamai sisiya bagibagina ivereku da weni nakanani ata berai.”

<sup>19</sup> Ma Yesu ina sisiya kubiine na bade Jiu damsi ivi bogebogesi. <sup>20</sup> Viya ivona bo, “Avi kubiine koiyanei? Tuna ineghanegha, kanuma berona itowatepani.”

<sup>21</sup> Ma viya ivona bo, “Tomowa kanuma berona gwabinai na ke kovokovoghina da weni nakanani iti sisiya. Ma kanuma berona ke meyani wawaya matapotapotana iti yawai.”

### *Jiu babadisi Yesu ibarei.*

<sup>22</sup> Taparoro Numana kana mara ghamana inekiibau da Jiu damsi ita kaporagha ma tuna na nuba kana mara.

<sup>23</sup> Nani maranai Yesu na Soromon Ina Tupatina kamoni ibababa, Taparoro Numana garina kamoni. <sup>24</sup> Ma Jiu babadisi imiiriviviri ma ivonei bo, “Mara iguri ghagha da kekiikiigudugudukai. Mikeda tam God ina Vivinevine Wawayina na kevona bubunikai.”

---

\* 10:14-15: Mat 11:27; Luk 10:22

<sup>25</sup> Ma Yesu ivonapotesi bo, “Vonavaghata namada avonemi ma ke koti tumaghaneku. Aku Mamai avanai bera ghamaghamasi aberai, ma nani berasi ivi debeku.

<sup>26</sup> Ma ke koti tumaghaneku, iyamna tami ke aku sipu.

<sup>27</sup> Aku sipu na akovisi. Gamoku iyanei ma ekivikiviniku.

<sup>28</sup> Yawasa makamakii nonowina averesi da ke ina rabobo, ma ke kovokovoghina da wawaya sago ina pisi da gwabikuwai ina viitawesi. <sup>29</sup> Aku Mamai ivi rewapana kirakai ma tuna aku sipu ivereku. Tuna kubiine na ke kovokovoghina da wawaya sago ina pisi da Mamai imanai ina viitawesi, <sup>30</sup> iyamna taku ma aku Mamai na sago.”

<sup>31</sup> Ma Jiu babadisi wakima iyuna da Yesu ita kiivunui.

<sup>32</sup> Ma ivonesi bo, “Aku Mamai avanai bera biibiisi ipeyari kirakai aberai da kokitai. Ma meni tuna kubiine kona kiivunuku?”

<sup>33</sup> Ma Jiu babadisi ivonapotei bo, “Ke bera biibiisi kubiine. Ma God kuvi avaberowei, tuna kubiine kana ravim, iyamna tam wawayota ma kevonavona da tam na God.”\*

<sup>34</sup> Ma Yesu ivonapotesi bo, “Ami vonaviyoyovana kamanina kamonai igiruma da God ami babada kurisi ivona bo, ‘Vonavaghata avonemi da tami na gods.’\* <sup>35</sup> Ma takovi da God vonana ke kovokovoghina da tavirai. Nani damsi na God vonana katamanina kurisi inekiibau ma ti kurisi ivona bo, ‘Tami na gods.’ <sup>36</sup> Tuna kubiine ke kona vona da God aiavaberowei maranai avonavona da taku na God Natuna, iyamna God ivinetaweku da tuna rapenai ma ivonataweku ku dobu. <sup>37</sup> Mikeda aku Mamai ina kayowana ke ata beraberai na vaghina, ke koni tumaghaneku. <sup>38</sup> Ma kegha da aberaberai. Mikeda aku sisiya ke kota vivitumaghane na aku bera biibiisi imamatara kurimi da koti tumaghana. Tuna tepanai kotakova bubuni da Mamai gwabikuwai ma taku gwabinai.”

---

\* 10:33: Lev 24:16      \* 10:34: Psa 82:6

<sup>39</sup> Ma Jiu babadisi ibera tovona meyei da ita votani ma ionagha da inae.

<sup>40</sup> Nani murinai Yesu ivovira Jordan okowina idamani ma inae da imapatana Jon rorova ibababataito na nani ku gawarina. Ma nani dobunai imakai.\* <sup>41</sup> Ma wawaya peyarisi iriyei kurina, ma ivonavona bo, “Jon matakira ghamaghamasi ke ita berai ma aviyavisina ivi sisiyei weni tomowina kubiine na vonavaghata.” <sup>42</sup> Ma wawaya peyarisi nani dobunai ivi tumaghana da Yesu na God ina Vivinevine Wawayina.

## 11

### *Lasaras irabobo.*

<sup>1</sup> Tomowa sago kana vava Lasaras na mara sago igubaga. Tuna Betani meyagina kamoni novunovuna Meri da Mata yavata imakamakai.\* <sup>2</sup> Weni Meri na karakava oira ghabughabuna ina viiya da Bada ku kaena ina tepoi ma uyawinai ina kiipupuni. Tuna wavinena novuna Lasaras igubaga kirakai.\* <sup>3</sup> Tuna kubiine Meri da Mata sisiya ivonatawei Yesu kurina. Ivona bo, “Bada, novukai na kwinam kiimatanina. Ma tuna na igubaga.”

<sup>4</sup> Ma Yesu weni sisiyina ivi yanei na ivona bo, “Weni gubagina ina damona na ke rabobo. Gubagina itupuwa da God kana kadara ini debei. Ma bade itupuwa da taku God Natuna kaku kadara ina rakata.” <sup>5</sup> Yesu ina nuwaviina ghamana na Mata da Meri ma novusi Lasaras. <sup>6</sup> Sisiya ivi yanei da Lasaras igubaga, ma kegha da ke ita nae. Imakai da mara ruwa ikovi na muriyai <sup>7</sup> kana kivikivina ivonesi bo, “Tavovirame ku Judiya.”

<sup>8</sup> Ma ivonapotei bo, “Kegha Bada, ke kovokovoghina da tavovirame. Raviraviyota Jiu babadisi kam diri itetei da

---

\* 10:40: Jon 1:28      \* 11:1: Luk 10:38-39      \* 11:2: Jon 12:3

wakimiyai ita kiivunum. Avi kubiine kekayokayowei da kuna vovirame nake?”

<sup>9</sup> Ma Yesu ivonapotesi bo, “Mara etomtoma na madegha egheghae ma yasegana everevereta enenae da raviyai eororu da evovokutuvi. Ma nani yaseganina kamoni wawaya ekitakita da ina baba bubuna ma ke kaesi ina takurei. <sup>10</sup> Ma wawaya didibarai ina baba na kaesi

ina takurei, nubakutuwa kubiine ke ina kita bubuna.”\*  
<sup>11</sup> Weni sisiyina ivi kovini ma ivonesi bo, “Kwinata Lasaras ikenanunuwapa, ma ana nae da ana kiivimataki.”

<sup>12</sup> Ma kana kivikivina ivonapotei bo, “Bada, mikeda ekenakena na karakava ini damini.”

<sup>13</sup> Ma Yesu, tuna Lasaras irabobo na ivivi sisiyei, ma kana kivikivina inotai da nama ita kenakenota. <sup>14</sup> Tuna kubiine vonavaghata ivi debei kurisi, ivona bo, “Lasaras na irabobo. <sup>15</sup> Ma tami kubiimi ainuwabiibai da taku ke nani dobunai, iyamna taraboga ina veremi da ami vitumaghana ina rakata. Tavomiiri ma tanae kurina.”

<sup>16</sup> Ma Tomas, kana vava sago Didimas, na turaturana ivonesi bo, “Peyarita tanae, da Bada yavata tarabobo.”

<sup>17</sup> Yesu ku Betani meyagina inenekiibau na akova iviyya da Lasaras tupuwina na buba ku kamona iterei da mara ruwamaruwa ikena. <sup>18</sup> Ma Betani da ku Jerusalem na ke ita rabaraba.† <sup>19</sup> Tuna kubiine Jerusalem kamoni Jiu damsi peyarisi ivi piyana da Mata ma Meri nuwanuba ita veresi, iyamna novusi ivi wapai.

<sup>20</sup> Mata ivi yanei da Yesu ipipisi na ikiibau da ita nepotei ma Meri tuna numiyyai imakai. <sup>21</sup> Ma Mata, Yesu ivonei bo, “Bada, mikeda tam weni dobunai na novuku ke

---

\* 11:10: Weni miibiina iyamna ruwa. Sago na Yesu ivonavonesi da tuna na i yasegana ma gisina kava ina kuyowesi, ina rabobo da ti na nuwapoya kamoni ina makai. Ma kana viruwa na taraboga wekarakava gwabisiyyai da God ina biga ina berai na tarabogina ke ini rekwei. † 11:18: Betani da ku Jerusalem na kilomita aroba.

ita rabobo. <sup>22</sup> Ma akovi da wekarakava aviyavisina God kurina kuni nowi na ina verem.”

<sup>23</sup> Ma Yesu ivonapotei bo, “Novum ina vomiiiri.”

<sup>24</sup> Ma Mata ivona bo, “Akovi da mara damonai wawaya kudubisi ina vovomiiri na novuku yavata.”

<sup>25</sup> Ma Yesu ivona bo, “Taku aku rewapanai da rab-orabobosi ina vomiiiri ma bade taku yawasa makamakii nonowina ana veresi. Iyavo kava ini tumaghaneku na namanaki ina rabobo ma kegha da yawasa ina panani. <sup>26</sup> Ma iyavo kava itumaghaneku na yawayawasisi ma kanumisi ke meyani ina rabobo. Weni sisiyina kitumaghanei bo kegha?”

<sup>27</sup> Ma Mata ivonei bo, “Bada, weni sisiyina na vonav-aghata. Taku aitumaghanem da tam na God Natuna, ina Vivinevine Wawayina. Ma kunumai kuoru ku dobu.”

### *Yesu itou.*

<sup>28</sup> Mata, Yesu yavata ivi sisiya ikovi ma murinai ivovira ku numa da Meri ikwatui. Ma gavunai ivonei bo, “Bada ipisi ma tam ivi tarakiyanem.” <sup>29</sup> Meri weni sisiyina ivivi yanei na ivomiiri da yaghiyaghinai inae Yesu kurina. <sup>30</sup> Ma Yesu na karakava ku meyagai ita rui, imapatana Mata ipanani na nani gawarinai imakamakai. <sup>31</sup> Ma iyavo kava numiiyai Meri itutuviiviiyei na ikitai da yaghiyaghinai ikiibau ma damsi ikivini, iyamna inotai da inenae ku karawaga da ita tou.

<sup>32</sup> Ma Meri inekiibau Yesu kurina na maghinonai itawotei. Ma ivonei bo, “Bada, tam namada kuta pisi na novuku ke ita rabobo.”

<sup>33</sup> Yesu ikitai da itutusiyasiyapa ma bade iyavo kava Meri yavata ipisi na ikitisi da ivivi tutuwana. Ma ivi nuwapoya kirakai da nuwanuwana idugari. <sup>34</sup> Ma ivi tarakiyanesi bo, “Tupuwina na imapatana koterei?”

Ma damsi ivonapotei bo, “Bada, kepisi ma tanae da kuna kitai.”

<sup>35</sup> Ma Yesu matadogana isororo. <sup>36</sup> Ma damsi ivona bo, “Kokitai, ina nuwaviina kurina irakata kirakai.”

<sup>37</sup> Ma viya ivona bo, “Tomowa matapotapotana ivi yawai da ikita, ma kade kovokovoghina da Lasaras ita vonatani da ke ita rabobo?”

*Yesu iberai da Lasaras rabobowai ivomiiri.*

<sup>38</sup> Lasaras tupuwina na buba kamoni ma matuketa na wakimiyai igudui. Ma Yesu ku karawaga inekiibau ma ivi nuwapoya kirakai da nuwanuwana idugara meyi.

<sup>39</sup> Ma ivona bo, “Buba guduna kovotabiri.”

Ma Mata ivona bo, “Bada tupuwina katerei ikena da mara ruwamaruwa ikovi. Namada bowana everaverau.”

<sup>40</sup> Ma Yesu ivona bo, “Namada avonemi ikovi da koni tumaghana na God kana kadara kona kitai.” <sup>41</sup> Ma damsi guduna ivotawei ma Yesu itepa ku kunuma ma ivona bo, “Mamai, aikiikiwem da kivi yaneku.

<sup>42</sup> Akovi da mara nonowa kiyaneke. Ma debiiyai aisisiya kurim da weni wawayisi imiiriyana na ini yaneku ma ini tumaghana da tam kuvonataweku.” <sup>43</sup> Yesu inipowana ikovi na gamo tepanai ikiirara bo, “Lasaras, kekiibau.”

<sup>44</sup> Vaghina ma tomowa raborabobona ere geregerena ivomiiri ma ibaba ikiibau. Ma Yesu ivonesi bo, “Karawaga garasi korupamatawei.”

*Wawayaya Yesu kana diri itetei da ita kiivunui.*

*(Mat 26:1-5; Mak 14:1-2; Luk 22:1-2)*

<sup>45</sup> Iyavo kava ipisi da Meri irurugenari na ikitai da Yesu bera ghamana iberai na peyarisi ivi tumaghane da tuna na God ina Vivinevine Wawayina. <sup>46</sup> Ma kegha da viya na ivovira Perisi damsi kurisi da Yesu aviyavisina iberai na ivi mamatara. <sup>47</sup> Tuna kubiine taparoro babadisi i babada ma Perisi damsi ivi kiidaburana da Sanhidran



dughuna ivi kwatuwei. Ma ivona bo, “Nani tomowina Yesu bera ghamaghamasi eberaberai na ikikava taberai? <sup>48</sup> Takitakuyowei na kana vava ina rakata da wawaya peyarisi ini tumaghaneɪ da tuna i kiivavo ma ina kivini. Ma Rome damsi varana ini yaneɪ na ina pisi da ita dobu, ita wawaya ma ita Taparoro Numana ina gwaramutui.”

<sup>49</sup> Ma nani dughuna kamonaɪ tomowa sago kana vava Kayapas, tuna nani madeghinai na taparoro badana ghamana. Ivona bo, “Tami neghaneghami. Ke sago aviyavisina kotakovi. <sup>50</sup> Konotai, ibiibai da wawaya sago kava ina rabobo ita wawaya kubiisi da ita dobu ke ina gwaramutui.” <sup>51</sup> Weni sisiyina na ke tuna mani ina nota iti sisiyei. Nani madeghinai tuna taparoro badana ghamana, tuna kubiine sisiyina God gwabinai iviɪya ma ivonakiiyaragha da Jiu damsi kubiisi na Yesu ita rabobo. <sup>52</sup> Ma ke nani dobuna damsi kava ma bade God natunatuna dobu ku kudubina kamonaɪ emakamakai na ti yavata ini kiisagosi da dam sago.

<sup>53</sup> Tuna maranaɪ Jiu babada Sanhidran kamonaɪ ivi karei da Yesu kana diri itetetei da iti raboboɪ. <sup>54</sup> Tuna kubiine Yesu ivi karei da ke debiiyai ita bababa Jiu damsi kamosiyai. Ikiibau ku meyagai sago kana vava Epraim, tuna warere ririnai. Ma nani dobunaɪ kana kivikivina yavata imakai.

<sup>55</sup> Gisina kava Jiu damsi i kaporagha marana iti karei, kamna kana vava Pasova, wawaya peyarisi Israel kamonaɪ igheghae ku Jerusalem da ita konuwa, ita vovunagha meyesi ma muriyai da kaporagha. <sup>56</sup> Ma wawaya peyarisi na ikitakitavirevire ma ivivi tarakiiyana Yesu kubiine. Taparoro Numana garina kamonaɪ ivivi miiriyana ma ivonavona bo, “Ikikava konotanotai? Mikeda ke ita pisi weni kamna kubiine bo?” <sup>57</sup> Ma taparoro babadisi i babada ma Perisi damsi wawaya ivonesi da iyavo kava

Yesu ita kitai na iti akovisi da tuna ita paniya.

## 12

*Meri oira ghabughabuna Yesu ku kaena itepoi.*

*(Mat 26:6-13; Mak 14:3-9)*

<sup>1</sup> Mara miikovimasago imakamakai da Pasova kamna iti karei ma Yesu inae ku Betani, Lasaras kurina. Tuna wawayina irabobo ma Yesu ivi yawai. <sup>2</sup> Lasaras ina nu-miiyai Yesu ina kam ivovunaghi. Mata wawayi kii vavai iyepa na iveresi. Ma Lasaras na Yesu ririnai imakai da yavata ikamkam. <sup>3</sup> Ma Meri na diudeu iviia, kamonai na oira ghabughabuna miiyanina irakata kirakai. Ikavara-piyei da Yesu ku kaena itepoi ma uyawinai kaena ikiiki-ipupuni. Ma oira ghabuna na numa kamona inunui.\* \*

<sup>4</sup> Ma kana kivikivina sago, Judas Iskariyot tuna mara sago Yesu ini wawanei, ke iti vaghinei ma ivona bo, <sup>5</sup> “Weni oirina miiyanina irakata kirakai, ruvana da wawayi madegha sago ita biga na kana miiya. Kati gimarei ma mane na wawayi moyamoyakisi kata veresi.” <sup>6</sup> Weni nakanani ivi sisiya na ke moyamoyakisi iti kamyuyuwesi kubiine. Tuna Yesu kana kivikivina i mane kutuna kana koyakoyagha ma bade tuna na yapiyapina da mara nonowa mane nevanavana iviiviitawei.

<sup>7</sup> Ma Yesu ivona bo, “Ita wavine kevoterei da ina kay-owanai ina berai. Aku rabobo marana itupo tuna kubi-ine evovovunaghiku.† <sup>8</sup> Moyamoyakisi na mara nonowa yavata kona makai ma taku na ke mara gurina da yavata tamakai.”\*

---

\* 12:3: Diudeuna na 500 milalita ruvana. \* 12:3: Luk 7:37-38 † 12:7:

Jiu dami i kiki da oira ghabughabunai wawayi raborabobosi tupuwisi evovovunaghi dogosi kubiine. Ma Meri ke itakovi da Yesu gisina kava ina rabobo. Weni berana Meri iberai na ina vigheghena ma ina vokavakavara Yesu kurina. Ma bade ivi kiikiwei da novuna Lasaras irabobo ma ivi yawai.

\* 12:8: Deut 15:11

*Jiu babadisi Lasaras kana diri itetei da ita kiivunui.*

<sup>9</sup> Koroto ghamana ivi yanei da Yesu tuna Betani meyanginai na ivi neyana, ke tuna kava kurina ma bade i kayowana da Lasaras ita kitai, iyamna wawayina irabobo ma Yesu iberai da ivomiiri. <sup>10</sup> Tuna kubiine taparoro babadisi i babada Lasaras kana diri itetei da Yesu yavata ita kiivunusi, <sup>11</sup> iyamna aviyavisina itupuwa Lasaras kurina iberai da waway peyarisi Yesu ivivi tumaghanei ma taparoro babadisi ivovoteresi.

*Yesu irui ku Jerusalem.*

*(Mat 21:1-11; Mak 11:1-11; Luk 19:28-40)*

<sup>12</sup> Mara itom na waway sisiya ivi yanei da Yesu ipipisi ku Jerusalem. Ma Pasova kamna kubiine na koroto ghamana Jerusalem kamoni. <sup>13</sup> Ma ti damsi yapi rugurugusi iyuna ma Yesu iverupotei. Ma ikiikiirara bo,  
“Hosana! Kaigheghenim!‡

Tam Bada avanai kepipisi!

God ini biibiinim,

tam Israel akii Kiivavo!”\*

<sup>14</sup> Muriyai da ku Jerusalem ita rui na Yesu donki votuna ku tepana igeru. Iki kava giruma katamana ivona na nakanani itupuwa. Igiruma bo,

<sup>15</sup> “O Zayon kwanatuna, ke kona yabumana.

Kokita, ami kiivavo epipisi,

tuna donki votuna tepanai igeru.”\*

<sup>16</sup> Weni berasi ituputupuwa na kana kivikivina iyamna ke ita vii bubuni. Ma karakava Yesu ita rabobo ma ita vomiiiri da kana kadara iti debei na nani murinai kana kivikivina inotapanani da weni berasi ti mani iberaberai na giruma katamana ivi sisiyei da ita tupuwa na itupuwa.

---

‡ 12:13: Hosana iyamna ‘God tavokavakavari’ \* 12:13: Psa 118:25-26

\* 12:15: Zech 9:9

<sup>17</sup> Iyavo kava matasiyai ikitai da Yesu, Lasaras ikwatui da karawagai ivomiiri na sisiyina ivi rakati. <sup>18</sup> Tuna kubiine koroto ghamana ikiibau da iverupotei, iyamna bera ghamana iberai na sisiyina namada ivi yanei. <sup>19</sup> Ma Perisi damsi ti mani kamosiyai ivivi sisiya bo, “Weni tuna ke kovokovoghina avi taberai. Kokitai, dam kudubina ekivikivini.”

*Grik damsi viya Yesu ita kitai.*

<sup>20</sup> Ma iyavo kava namada ipisi ku Jerusalem da Pasova kamna kamoni ita vokavakavara ma kamosiyai viya na Grik damsi. <sup>21</sup> Ma ti damsi inae Piripo kurina (tuna ina kwanatu Betsaida, Gariri dobunai). Ma ivi nowi kurina, ivonei bo, “Bada, akii kayowana da Yesu kata kitai.”

<sup>22</sup> Ma Piripo inae da Anduru ivonei ma ivi ruwa inae da Yesu ivi akovi. <sup>23</sup> Ma ivonapotesi bo, “Marana ipisi da Wawaya Natusi kana kadara ini debei. <sup>24</sup> Vonavaghata avonavonemi, pei kuna dogoi ku dowo na ina tupuvurana ma wadubona ina rabobo da vuna ina ghae. Ma vuna na peina ina terei da ina peyari. Ma pei ke kuna voni na ke kovokovoghina da ina peyari, patana da sago kava. <sup>25</sup> Wawaya iyi ina yawasa dobuwai ina vivinuwabiibiyeyi na ini wapai. Ma iyi ina yawasa dobuwai ina vere meyei taku kubiiku na yawasa makamakii nonowina ina panani.\* <sup>26</sup> Wawaya iyi ekayokayowei da tuna aku bigabiga na ina kiviniku da taku imapatana ana makamakai na tuna gwabikuwai. Ma ina biga kubiiku na aku Mamai ini ghegheni.”

*Yesu ina rabobo ivi mamatarei.*

<sup>27</sup> “Ma wekarakava na ainuwapoya kirakai ma aviyavisina ana vonei? Ata vona bo, ‘Mamai, kevowaguku da weni marana kamoni vokwarakwara damina ke

\* 12:25; Mat 10:39, 16:25; Mak 8:35; Luk 9:24, 17:33

ana viiya.’ Ma kegha, weni marana kubiine na apisi ku dobu. <sup>28</sup> Mamai, kam kadara kevi debei ku dobu da wawaya ina kitai.”

Ma kunumai wawaya gamona sago ivona bo, “Kaku kadara namada avi debei ma bade ani debe meyei.”

<sup>29</sup> Ma koroto ghamana nani dobunai imiimiiri na gamona ivi yanei. Ma viya ivona da wariskeyakeya, ma bade viya ivona da aneya ivi sisiya kurina.

<sup>30</sup> Ma Yesu ivona bo, “Nani gamona ivi sisiya na ke taku kubiiku ma tami kubiimi. <sup>31</sup> Marana inekiibau da God wawaya dobuwai ini tupaviresi ma ini wavusi da berabero iberai. Ma bade weni dobuna kana kiivavo ina rewapana ina kutawei. § <sup>32</sup> Ma taku na wawaya ina ruepiku ku kiidamo na ana berai da wawaya peyarina ana tinariyesi kuriku.” <sup>33</sup> Weni nakanani ivi sisiya na ivi debei da tuna ikikava ina rabobo.

<sup>34</sup> Ma nani korotona ivonapotei bo, “Moses ina vonaviyoyovana kamonai ivoneta da God ina Vivinevine Wawayina na ina makii nonowa. Ma avi kubiine kevonavona da Wawaya Natusi ina ruepai? Ma bade Wawaya Natusi na iyai?”\*

<sup>35</sup> Ma Yesu miibiiyai ivonesi bo, “Wawaya nubakutuva kamonai ina bababa na ke itakovi da mike enenae. Tuna kubiine yasegana gwabimiyai emakamakai na kobaba, iyamna gisina kava ma yasegana koni wapai da nubakutuva ina kamowanimi. <sup>36</sup> Yasegana gwabimiyai na ami vitumaghana kurina koterei da tami na yasegana natunatuna.” Yesu ivi sisiya ikovi na inekuyowesi. Ma nani murinai na iveraveruvuvuresi.

### *Wawaya Yesu ke ita vivitumaghanei.*

---

§ 12:31: Ivona bo, ‘weni dobuna kana kiivavo’ na Seitan isisiyei. \* 12:34: Psa 110:4; Isa 9:7; Ezek 37:25; Dan 7:14

<sup>37</sup> Namanaki da Yesu matakira ghamaghamasi wawaya maghinosiyai iberai da ikitai ma patana da ke ita vivitumaghanei. <sup>38</sup> Peroveta Aisaya aviyavisina igiruma da ita tupuwa na etuputupuwa. Ivona bo, “Bada, am sisiya kaiyonayonei ma wawaya ke ita vivitumaghanei.

Ma am rewapana kuvi debei kurisi ma patana da akovim ke ita viiviiya.”\*

<sup>39</sup> Tuna kubiine damsi ke iti tumaghana. Ma bade peroveta Aisaya igiruma bo,

<sup>40</sup> “Matasi ikiipotai,

ma nuwanuwasi igudui da ke kovokovoghina ita kita, ma ke kovokovoghina da sisiya iyamna itakovi.

Ma Bada ivona bo,

‘Tuna kubiine damsi ke ita miiritavire kuriku da ati yawasisi.’”\*

<sup>41</sup> Aisaya namada Keriso ere kadakadarina ikitai, tuna kubiine nakanani igiruma.

<sup>42</sup> Ma Jiu damsi ipeyari kirakai Yesu ivi tumaghanei ma kamosiyai na i babada viya yavata. Ma ke ita kayokayowei da i vitumaghana iti debei, iyamna Perisi damsi iyabuyabumanesi. Iti mamatara da Yesu itumaghanei na kii gawara kiki numana kamonai iti wapai ma iti kiibu tuwanonowisi. <sup>43</sup> Ti na ke ita notai da God iti gheghenisi, tuna na bera ghamana. Ma i kayowana ghamana da wawaya iti gheghenisi.

*Yesu ina sisiya ini wavusi da ti na berabero wawayisi.*

<sup>44</sup> Yesu gamo tepanai ivi sisiya, koroto ghamana ivonesi bo, “Wawaya iyi itumaghaneku na ke taku kava ita vivitumaghaneku ma wawayina ivonataweku na tuna yavata. <sup>45</sup> Ma taku ekitakitiku na bade wawayina

---

\* 12:38: Isa 53:1      \* 12:40: Isa 6:10

ivonataweku ekitakitai. <sup>46</sup> Taku na dobu kana yasegana, tuna kubiine apisi. Ma iyavo kava itumaghaneku na ke nubakutuva kamonai ita makamakai. <sup>47</sup> Wawaya iyi aku sisiya ivi yanei ma ke ita vovotekatekei na ke taku aku biga da ani tupavirei. Apisi ku dobu na ke wavu ana verei ma viyawasina kubiine. <sup>48</sup> Ma iyavo kava taku ibareku ma aku sisiya ibarei, mara damonai wawaya sago ini tupaviresi ma kovogha ina veresi, iyamna namada vonavaghata ke iti vaghinei. Ma tuna ini debei da ti na berabero wawayisi, <sup>49</sup> iyamna avi sisiya na ke taku aku rewapanai, ma Mamai ivonataweku, tuna ivoneku da ikikava ati sisiya ma aviyavisina ati sisiyei. <sup>50</sup> Tuna kubiine aviyavisina Mamai ivoneku na tuna kava aisisiyei ma akovi da nani sisiyisi wawaya ini nowesi da yawasa makamakii nonowina ina panani.”

## 13

*Yesu kana kivikivina kaesi ikowa.*

<sup>1</sup> Mara ita tom na Pasova kamna kana mara, ma Yesu iakovi da ina mara ipisi da dobu ita kuyowei ma ita ghae ina Mamai kurina. Kana kivikivina kurisi ina nuwaviina irakata, tuna kubiine wekarakava ina nuwaviina vaghata ini debei kurisi.

<sup>2</sup> Ravi ipika, ikamkam ma nani kamonai na namada Saimon Iskariyot natuna Judas nota berona Devil gwabinai iviyya da Yesu iti wawanei. <sup>3</sup> Ma Yesu iakovi da ina Mamai rewapana iverei da bera kudubina iti badei. Ma bade iakovi da tuna God gwabinai ioru ma ina vovira kurina. <sup>4</sup> Tuna kubiine kam kamonai ivomiiri da tepana garana ivotawei ma kiipupuna iviyya da borinai ikuni. <sup>5</sup> Muriyai na okowa ku dabira itepoi ma ivi karei da kana kivikivina kaesi ikowakowa ma ikiikiipupuna. <sup>6</sup> Ma ipisi Saimon Pita kurina na Saimon Pita ivona bo, “Bada, avi kubiine kaeku kuna kowai?”

<sup>7</sup> Ma Yesu ivonapotei bo, “Aviyavisina wekarakava aber-  
 aberai na ke kutakovi da avi kubiine. Ma karakava da  
 kunakovi.”

<sup>8</sup> Ma Pita ivona bo, “Kegha Bada, ke kaeku kuna kowai.”

Ma Yesu ivonapotei bo, “Kaem ke ana kowai na tam na  
 ke kaku kivikivina.”

<sup>9</sup> Ma Saimon Pita ivonapotei bo, “Bada, nakanani na ke  
 kaeku kava ma imaku ma gayamiku yavata kuna kowai.”

<sup>10</sup> Ma Yesu ivonapotei bo, “Wawaya namada ivi yeka  
 na kaena kava ina kowai, iyamna tupuwina na biibiina.  
 Ma tami peyarimi na yagharimi ma kamomiyai wawaya  
 sago kava na kegha.” <sup>11</sup> Yesu iakovi da meni wawayina  
 ini wawanei, tuna kubiine ivona bo, “Ke peyarimi na  
 yagharimi.”

<sup>12</sup> Ma kaesi ikowa ikovi na kana gara ikote meyei,  
 ma ivovira da kana ku gawara. Ma ivi tarakiiyanesi bo,  
 “Kade koakovi da aviyavisina kurimi aberai?\*” <sup>13</sup> Tami  
 kovonavoneku da taku na ami Bada ma ami vibeye-  
 beyena wawayiku. Ma kovona bubuna, taku na nakanani.  
<sup>14</sup> Ma wekarakava taku ami Bada ma ami vibeyebeyena  
 wawayiku kaemi akowa na tami bade nakanani tu-  
 raturami kaesi kona kowa. <sup>15</sup> Taku vibeyebeyena bi-  
 ibiina aberai da kokitai. Ma tami bade nakanani  
 koni boneboneku. <sup>16</sup> Vonavaghata avonavonemi da biga-  
 biga wawayina ina bada ke ina ghekuyowei. Ma yonayona  
 ke meyani ina ghe kirakai da wawaya iyai ivonavonatawei  
 na ina ghekuyowei.\* <sup>17</sup> Wekarakava akovina koviiya da  
 weni berasi kota berai. Kona berai na God ini biibiinimi.”

<sup>18</sup> “Weni sisiyisi na ke peyarimi ata vononavonemi.  
 Avinemi da kaku kivikivina ma akova bubunimi da

---

\* 13:12: Luk 22:27 \* 13:16: Mat 10:24; Luk 6:40; Jon 15:20



tami ikikava wawayimi. Ma kegha da giruma kata-mana kamoni igiruma da wawaya sago parawa yavata kani vogimei na tuna wawayina ini ghaviyeku. Ma marana enenekiibau.\* <sup>19</sup> Karakava berana ina tupuwa na namada avi akovimi. Ma kona kitai da aviyavisina avonemi ina tupuwa na koni tumaghana da taku na God ina Vivinevine Wawayina. <sup>20</sup> Vonavaghata avonavonemi da wawaya iyai aku yonayona wawayina ini kiikiiwei na taku bade ikiikiiweku. Ma iyai ini kiikiiweku na bade wawayina ivonataweku na tuna yavata ikiikiiwei.”\*

*Yesu ivi akovisi da wawaya sago ini wawanei.*

*(Mat 26:20-25; Mak 14:17-21; Luk 22:21-23)*

<sup>21</sup> Yesu ivi sisiya ikovi na nuwanuwana idugari ma nuwapoya ivii kirakiiyei da debiiyai ivona bo, “Vonavaghata avonavonemi da kamomiyai na wawaya sago ini wawaneku.”

<sup>22</sup> Ma kana kivikivina ivi kitavonevoneyana ma nuwanuwasi ivivi tetei da iyi weni berana ina berai. <sup>23</sup> Ma kana kivikivina sago na Yesu ina nuwaviina ghamana. Ma tuna wawayina na ririnai imakamakai, <sup>24</sup> ma Saimon Pita gayamina irutawei kurina ma ivona bo, “Kevi tarakiiyanei da iyi evonavonei.”

<sup>25</sup> Ma tomowina ivi rugwabi Yesu kurina ma ivonei bo, “Bada, wawayina na iyai?”

<sup>26</sup> Yesu ivonapotei bo, “Weni parawina ku redu ana kiikutuvi na wawaya sago ana verei. Wawayina na tuna.” Nani murinai parawa iviia ikiikutuvi ma Saimon natuna Judas Iskariyot iverei. <sup>27</sup> Ma Judas parawa iviiviini na Seitan itowatepani da ivi badei. Ma Yesu ivona bo, “Kevi yaghiyaghina. Aviyavisina kenotanotai da kuta berai na wekarakava keberai.” <sup>28</sup> Ma nani kamna

\* 13:18: Psa 41:9 \* 13:20: Mat 10:40; Mak 9:37; Luk 9:48, 10:16

kamonai ke sago iyi itakovi da avi kubiine Yesu weni nakanani Judas ivonei. <sup>29</sup> Viya inotai da Yesu ivonei da vavai ita gimara bo wawaya moyamoyakisi mane ita veresi, iyamna Judas na i mane kana koyakoyagha.

<sup>30</sup> Ma vaghina Judas parawa ivopotei ma numa iki-ibutawei da ku nubakutuva irui.

*Yesu sisiya bagibagina vuna iveresi.*

<sup>31</sup> Judas ikiibau inae ma nani murinai Yesu ivona bo, “Marana inekiibau da taku Wawaya Natusi kaku kadara ani debei. Ma bade aviyavisina ina tupuwa kuriku na God kana kadara ini debei. <sup>32</sup> Ma nani berasi wekarakava ina tupuwa na bade taku God Natuna kaku kadara ini debei. <sup>33</sup> Natunatuku, ke mara gurina ma ana kuyowemi. Ma Jiu babadisi ikikava avonesi na tami bade nakanani avonavonemi. Kona kita kaviku iyamna mike ana nae na tami ke kovokovoghina da kona kiviniku.\* <sup>34</sup> Tuna kubiine sisiya bagibagina vuna avereveremi. Kovi nuwaviinavivirana. Ikikava taku nuwanuwami aviiyiya, tami bade nakanani kovi nuwaviinavivirana.\* <sup>35</sup> Ma kamomiyai koni nuwaviina na wawaya peyarisi inakovi da tami na kaku kiviivina.”

*Yesu ivi debei da Pita ini bero.*

*(Mat 26:31-35; Mak 14:27-31; Luk 22:31-34)*

<sup>36</sup> Ma Saimon Pita ivi tarakiiyana bo, “Bada, mike kene-nae?”

Ma Yesu ivonapotei bo, “Mike anenae na tam wekarakava ke kovokovoghina da kuna kiviniku. Ma karakava da kuna kiviniku.”

<sup>37</sup> Ma Pita ivi tarakiiyana bo, “Bada, avi kubiine ke wekarakava ana kivinim? Aku yawasa anuwatawei da tam kubiim ana rabobo.”

---

\* 13:33: Jon 7:34 \* 13:34: Jon 15:12, 17; 1Jon 3:23; 2Jon 5

<sup>38</sup> Ma Yesu ivonapotei bo, “Vona bubuna bo kegha da am yawasa kuna nuwatawei kubiiku? Vonavaghata avonavonem, muriyai da kokoreko ina tou na tam mara aroba kuni bero da ke kutakoviku.”

## 14

*Yesu na keta ina Mamai kurina.*

<sup>1</sup> Yesu kana kivikivina ivonesi bo, “Ke koni nuwapoya kirakai. Namada God koitumaghanei ma bade taku yavata kovi tumaghaneku. <sup>2</sup> Aku Mamai ina numa kamonai na gawara ipeyari kirakai, ma ani nao da kami gawara ana vovunagha. Mikeda ke nakanani na namada ati akovimi. Ke ata vivibero, vonavaghata aisisiyei. <sup>3</sup> Ana nae, kami gawara ana vovunagha ina kovi ma murinai ana vovira na ana rutinimi da yavata tanae. Ma meni dobunai ana makamakai na mara nonowa tami na taku yavata tamakai. <sup>4</sup> Ma namada koakovi da mike anenae, ma bade ikikava nani ku dobuna kota nae na ketana namada koakovi.”

<sup>5</sup> Ma Tomas ivona bo, “Bada, ke katakovi da mike kenenae, tuna kubiine ikikava nani ketana kanakovi?”

<sup>6</sup> Ma Yesu ivonapotei bo, “Vaghina ketana na taku. Taku na keta, ma taku na vonavaghata, ma taku na yawasa. Taku tepakuwai da wawaya aku Mamai kurina ina nae, ke sago keta kana viruwa ita makamakai. <sup>7</sup> Kotakova bubuniku na bade aku Mamai kotakova bubuni. Ma aku Mamai akovina na karako weni maranai koviiviya ma bade matamiyai kokitakitai.”

<sup>8</sup> Ma Piripo ivona bo, “Bada, am Mamai kevi debei kurikai da kana kitai. Tuna kava kakayokayowei.”

<sup>9</sup> Ma Yesu ivonapotei bo, “Piripo, tam na ikikava? Patana da ke kutakovi da taku iyai, bo? Namadani kava yavata tamakii patapata na kutakova bubuniku. Ma iyavo kava taku ikitiku na bade aku Mamai ikitai.”

Avi kubiine kuvona bo, ‘Am Mamai kevi debei kurikai?’  
<sup>10</sup> Kitumaghana bo kegha da taku na mara nonowa aku Mamai gwabinai, ma bade aku Mamai na mara nonowa gwabikuwai emakamakai. Weni sisiyisi avonavonemi na ke taku mani aku sisiya ma aku Mamai gwabikuwai ina biga eberaberi na aisisiya. <sup>11</sup> Aku sisiya kovi tumaghanei, avonavonemi da taku ma aku Mamai na sago. Ma bade bera ghamaghamasi aberai na tuna yavata ivi matakira kurimi da koti tumaghana. <sup>12</sup> Ma vonavaghata avonavonemi, iyavo kava ini tumaghaneku na aviyavisina aberaberi na ti yavata nakanani ina berai. Ma bade ku tepana i bera ina peyari ma ina rakata kirakai, iyamna anenae aku Mamai kurina. <sup>13</sup> Avakuwai koni nowi na ana berai kubiimi da taku tepakuwai aku Mamai kana kadara ina rakata. <sup>14</sup> Aviyavisina peyarina avakuwai koni nowi na ana berai.”

*Yesu vonakiiyapa bagibagina iterei da Kanuma Vovokaravina ina vonatawei.*

<sup>15</sup> Yesu ivonesi bo, “Nuwanuwaku kona viini na aku sisiya bagibagisi kona votekatekei. <sup>16</sup> Ma aku Mamai kurina ani nowi da wawaya sago ina vonatawei kurimi da mara nonowa gwabimiyai ina makamakai ma ina vivi vitemi. <sup>17</sup> Wawayina na Kanuma Vovokaravina ma mara nonowa vonavaghata ina vividebei kurimi. Ma iyavo kava dobuwai ke ita vivitumaghaneku na ke kovokovoghina da Kanuma Vovokaravina ina viiya, iyamna ke itekwekwai ma eveyaveyiyei. Ma tami na namada wawayina koakovi iyamna kamomiyai emakamakai ma bade karakava gwabimiyai ina runuma.”

<sup>18</sup> “Ke ana nae vaghata da tami nakanani ma kami koyakoyagha kegha. Ana vovira kurimi. <sup>19</sup> Ke mara gurina ma iyavo kava dobuwai ke ita vivitumaghaneku na ke ina kita meyeku. Ma tami kava na kona kitiku. Ma taku

yawayawaku kubiine na tami bade yawasa kona panani. <sup>20</sup> Aku rabobo murinai na ana vovira kurimi. Kona kita meyeku na nani maranai damina kona viiya da taku na aku Mamai gwabinai, ma tami na taku gwabikuwai, ma bade taku na tami gwabimiyai.”

<sup>21</sup> “Wawaya iyai aku sisiya bagibagisi iyanei ma evovotekatekei, tuna wawayina nuwanuwaku iviyya. Nuwanuwaku kuna viiya na aku Mamai nuwanuwam ina viiya. Ma bade taku nuwanuwam ana viiya da ana rumatara kurim.”

<sup>22</sup> Ma Judas sago (tuna ke Judas Iskariyot ma Judas bogiiyai) ivona bo, “Bada, avi kubiine kekayokayowei da kuna rumatara kurikai, ma ke dam kudubina kurisi?”

<sup>23</sup> Ma Yesu ivonapotei bo, “Wawaya iyai aku vibeyebeyena iyanei ma evovotekatekei, tuna wawayina nuwanuwaku iviyya. Ma aku Mamai wawayina nuwanuwana ina viiya. Ma taku aku Mamai yavata kana nae kurina da gwabinai kana makii patapata. <sup>24</sup> Meni wawayina nuwanuwaku ke ita viiviiya, tuna wawayina na aku vibeyebeyena ke ita vovotekatekei. Weni sisiyina avonavonemi koiyanei na ke taku aku sisiya ma aku Mamai ina sisiya, tuna ivonataweku da apisi.”

<sup>25</sup> “Wekarakava na yavata tamakamakii patapata ma kamomiyai na weni sisiyisi kudubina avonavonemi.

<sup>26</sup> Ma aku Mamai avakuwai kami vivita ina vonatawei, tuna na Kanuma Vovokaravina. Tuna bera kudubina ini beyebeyemi, ma bade ini akovimi da aviyavisina ai-sisiyei kurimi na ke koni notawapei.”

<sup>27</sup> “Ke koni nuwapoya kirakai ma ke kona yabumana. Nuwanuba kamomiyai ina makai. Aku nuwanuba avereveremi. Ma weni nuwanubana na ke dobu kana nuwanuba nakanani. <sup>28</sup> Namada avi akovimi ikovi da ana nae ma bade ana vovira kurimi. Tami nuwanuwaku kota viiya na koti nuwabiibai da taku anenae aku Mamai

kurina, iyamna aku Mamai na ighe kirakai, ke taku nakanani. <sup>29</sup> Wekarakava avononemi ma muriyai da berasi ina tupuwa. Ina tuputupuwa kona kitakitai na koni tumaghaneku. <sup>30</sup> Aku mara ke ita guri da ani sisiya kurimi, iyamna weni dobuna kana kiivavo epipisi.\* Ma tuna ina rewapana ke kovokovoghina da taku ina ghekuyoweku. <sup>31</sup> Ma kegha da dam kudubina dobuwai akova ina viiya da aku Mamai nuwanuwana aviya, tuna kubiine ina kayowana kava ana berai.”

“Vaghina, kovomiiri ma tanae.”

## 15

### *Greipi uravina miibiina.*

<sup>1</sup> “Taku na greipi uravina kunukununa vaghata ma aku Mamai na vao kana koyakoyagha. <sup>2</sup> Ma meni raghana ke ita amame na ina kiiyaraghatawei. Ma bade meni raghana iamame na ina kuya bubuni da ina ruyaghari na iname kirakai. <sup>3</sup> Ma tami na aku vibeyebeyena kovi tumaghane, tuna kubiine namada ami yawasa na yagharina. <sup>4</sup> Gwabikuwai komakai ma bade taku gwabimiyai ana makai, iyamna ke kovokovoghina da greipi raghana ita kiiyaraghatawei da tuna mani ita makii duma da itame. Nakanani bade gwabikuwai kota turataweyana na ke kovokovoghina da kotame.”

<sup>5</sup> “Taku na greipi uravina kunukununa ma tami na ragharaghana. Meni wawayina gwabikuwai ina makai, ma bade taku gwabinai ana makai na iname kirakai. Iyi tam gwabikuwai kuna turataweyana na ke sago aviyavisina kuni tupuwi. <sup>6</sup> Meni wawayina ke gwabikuwai ina makai, tuna nakanani ma greipi raghana ikiiyaraghatawei ma itawei da ina poki. Ma

---

\* 14:30: Dobu kana kiivavo na Seitan.

ragharaghasi pokipokisi wawaya ina yuna da ku keyama karakaratina ini tawetaweyana da ina karai. <sup>7</sup> Ma gwabikuwai kona makai ma vonaku kona vokikini ma koni nowi na aviyavisina kokayokayowei na aku Mamai ina veremi. <sup>8</sup> Ma koname kirakai na koni debe meyemi da tami na kaku kivikivina vaghata. Nakanani kona berai na aku Mamai kana kadara ina rakata. <sup>9</sup> Ikiava aku Mamai nuwanuwaku iviia, nakanani nuwanuwami aviiya. Ma tami na aku nuwaviina kamoni komakai, ke kona kiibutawei. <sup>10</sup> Ma ikiava taku aku Mamai ina sisiya bagibagisi avovotekatekei da ina nuwaviina kamoni amakamakai na tami bade nakanani, aku sisiya bagibagisi kona votekatekei da tami aku nuwaviina kamoni kona makai.”

<sup>11</sup> “Weni tuna avonavonemi da aku nuwabiibai damina kona viiya, da tami yavata koni nuwabiibai. Ma nani nuwabiibiina nuwanuwami ini tupoi. <sup>12</sup> Ma aku sisiya bagibagina na weni, ikiava taku nuwanuwami aviiya na bade nakanani kovi nuwaviinavivirana.\* <sup>13</sup> Nuwaviina ghamanakina na weni, meni wawayina kwinana kubiine ina rabobo na tuna wawayina ina nuwaviina irakata kirakai. <sup>14</sup> Ma aku sisiya kona votekatekei na tami na turaturaku. <sup>15</sup> Wekarakava na ke ata vonavonemi da tami na aku bigabiga wawayimi, iyamna bigabiga wawayisi i bada aviyavisina eberaberi na ke itakovi. Ma tami na avonavonemi da turaturaku, iyamna aku Mamai ina bera kudubina avi damani kurimi. <sup>16</sup> Ma ke tami kota vineku, taku tami avinemi da kona kiibau ma koname da amemi ina makii nonowa. Nani maranai aviyavisina kona kayokayowei na avakuwai aku Mamai kurina koni nowi na ina veremi. <sup>17</sup> Aku sisiya bagibagina kurimi na weni, kovi nuwaviina bubuna.”

---

\* 15:12; Jon 13:34, 15:17; 1Jon 3:23; 2Jon 5

*Wawaya, Yesu kana kivikivina ina baresi.*

<sup>18</sup> Yesu ivona bo, “Wawaya dobuwai ina babaremi na konotai da kunona na taku ikiibareku. <sup>19</sup> Ami dobu vaghata dobuwai ita makamakai na wawaya ita kayowana kirakiiyemi. Ma tami na ke weni dobuna ina wawaya, iyamna taku dobu kamoni avinetawemi. Tuna kubiine na dobu ina wawaya ebaremi. <sup>20</sup> Ami nota evovira da aku sisiya ikikava aterei kurimi na kona notai. ‘Biga kana kavakavara wawayina ke ina ghae da ina bada ina ghekuyowei.’ Taku ikikava itupaketowaneku na bade tami nakanani ini tupaketowanemi. Ma ikikava aku vibeyebeyena iviia na bade nakanani tami ami vibeyebeyena ina viiya.\* <sup>21</sup> Tami na kaku kivikivina kubiine na wawaya ini tupaketowanemi, iyamna ti na God ke itakovi ma tuna ivonataweku ku dobu. <sup>22</sup> Mikeda ke ata pisi da ati sisiya kurisi na i berabero wavuna ke ita kavari. Ma avi sisiya kurisi, tuna kubiine ke sago iyai ina vona bo, ‘Tokai weni berasi kabereberai na ke katakovi da tuna na berabero.’ <sup>23</sup> Ma iyavo kava taku ebareku na bade aku Mamai ebaremi. <sup>24</sup> Mikeda taku bera ghamaghamasi ke ata berai na wawaya i berabero wavuna ke ita kavari. Ma nani berasi gwabisiyai aberai na ke sago wawaya dobuwai nakanani ita berai. Wawaya bera ghamaghamasi matasiyai ikitai ma kegha da taku aku Mamai yavata ebarekai. <sup>25</sup> Giruma katamana kamoni weni berasi namada ivi sisiyei na itupuwa. Ivona bo, ‘Ke sago aviyavisina gigituna ma ibareku.’ ”\*

<sup>26</sup> “Ma kami Vivita na ana vonatawei kurimi. Tuna na Kanuma Vovokaravina ma vonavaghata ina vividebei kurimi. Tuna na aku Mamai gwabinai ina pisi ma kubiiku ini mamatara. <sup>27</sup> Ma tami bade kubiiku nakanani koni mamatara, iyamna karena da ku damona na tami

\* 15:20: Mat 10:24; Luk 6:40; Jon 13:16      \* 15:25: Psa 35:19, 69:4



gwabikuwai ma bera peyarina matamiyai kokitai da koni mamatarei.”

## 16

<sup>1</sup> Yesu ivonesi bo, “Weni sisiyisi avonavonemi da ami vitumaghana ke ina peku. <sup>2</sup> Mara karakava epipisi da kiki numasi kamosiyai ini kiibu tuwanonowimi. Ma wawaya ini kiivunuwanemi na ina notai da God ina biga eberaberai. <sup>3</sup> Weni berasi ina berai kurimi iyamna taku ma aku Mamai yavata ke itakovikai. <sup>4</sup> Ma weni sisiyisi wekarakava avonavonemi da maranai weni berasi kurimi ina tuputupuwa na ami nota ina vovira da aviyavisina aisisiyei na kona notai. Ma rorova ke ata vonemi da weni berasi ina tupuwa, iyamna yavata tamakamakii patapata.”

### *Kanuma Vovokaravina ina bera.*

<sup>5</sup> “Ma karako na ana voteremi ma wawayina ivonataweku ku dobu na ana vovira kurina. Ma kamomiyai ke sago iyai iti tarakiyaneku bo, ‘Mike kuna nae?’ <sup>6</sup> Ma avonemi da ana nae na koinuwapoya kirakiyei. <sup>7</sup> Ma vonavaghata avonavonemi da tami ami biibiina kubiine na ana nae. Ke ana nae na kami Vivita ke ina pisi, tuna na Kanuma Vovokaravina. Ma ana nae kubiine na ina pisi, iyamna wawayina na taku ana vonatawei kurimi. <sup>8</sup> Ina pisi na wawaya dobuwai ini debesi da ti na berabero wawayisi. Ma ini akovisi da avi berasi na maninisi God ku matana. Ma bade ina vonesi da mara sago God ini tupaviresi. <sup>9</sup> Ini debesi da i berabero ghamanakina na weni, taku ke ita vivitumaghaneku. <sup>10</sup> Ma anenae aku Mamai kurina da ke kona kitiku na Kanuma Vovokaravina wawaya ini akovisi da bera maninisi God ku matana na ikikava. <sup>11</sup> Ma bade ina vonesi da mara sago God ini tupaviresi,

iyamna namada ivonakiiyaragha da weni dobuna kana kiivavo wavu iviyya ma kovogha ina panani.”

<sup>12</sup> “Aku kayowana da wekarakava sisiya ipeyari ati damani kurimi ma tami ke kovokovoghina da kudubina kona vii yavui. <sup>13</sup> Ma Kanuma Vovokaravina na vonavaghata ina vividebei. Tuna ina pisi kurimi na ini vitemi da vonavaghata kudubina konakova bubuni. Aviyavisina gwabikuwai iyanei na tuna kava ini damani ma ke tuna mani ina nota ina veremi. Ma aviyavisina karakava ina tupuwa na namada ini akovimi. <sup>14</sup> Vonavaghata gwabikuwai ina viiyya na ini damani kurimi da kaku kadara ini debei. <sup>15</sup> Aviyavisina peyarina aku Mamai rapenai na bade taku rapekuwai. Tuna kubiine avona da vonavaghata gwabikuwai Kanuma Vovokaravina ina viiviiya na ini damadamani kurimi.”

*Yesu kana kiviivina nuwapoya ina voterei ma ini nuwabiibai.*

<sup>16</sup> “Gisina kava ma maghighiku koni wapai. Ma nani murinai na ke mara gurina ma kona kita meyeku.”

<sup>17</sup> Ma kana kiviivina kamosiyai ivivi tarakiiyana meyesi bo, “Avi kubiine ivona bo, ‘Gisina kava ma maghighiku koni wapai. Ma nani murinai na ke mara gurina ma kona kita meyeku?’ Ma bade avi kubiine evonavona bo, ‘Ana nae aku Mamai kurina.’” <sup>18</sup> Ma damsi patana da ivivi sisiya bo, “‘Ke mara gurina’ na iyamna avai? Weni sisiyisi na avi kubiine na ke damina kata viiviiya da aviyavisina isisiyei?”

<sup>19</sup> Ma Yesu namada i nota iakovi, tuna kubiine ivonesi bo, “Akovi da koti tarakiiyaneku. Avonemi da gisina kava ma maghighiku koni wapai ma bade avonemi da ke mara gurina ma kona kita meyeku. Ma nani sisiyisi kokayokayowei da iyamna kotakovi bo?

<sup>20</sup> Vonavaghata avonavonemi, aviyavisina ina tupuwa

kuriku na wawaya peyarisi ini nuwabiibii kirakiiyei. Ma tami na kona tusingiyapa. Koni nuwapoya kirakai ma kegha da murinai ami nuwapoya ina kovi ma koni nuwabiibai. <sup>21</sup> Tuna na nakanani ma wavine vituwa kubiine ita vivivowavowa ma ita vovokwarakwara. Ma natuna ini tuwei murinai na ina vokwarakwara ina kovi ma ini nuwabiibii kirakai, iyamna natuna ivi tuwatawei ku dobu. <sup>22</sup> Ma tami nakanani damina koviiviiya, wekarakava na koinuwapoya. Ma gisina kava ana kita meyemi na koni nuwabiibii kirakai. Ma nani nuwabiibiina ke sago iyai ina viitawei.”

<sup>23</sup> “Vonavaghata avonavonemi, nani maranai aviyavisina kona kayokayowei na ke taku kuriku ma aku Mamai kurina koni nowi. Avakuwai maninina aku Mamai kurina koni nowi na ina veremi. <sup>24</sup> Ke meyani da avakuwai koti nowi tovona. Ma karako na avakuwai koni nowi na ina veremi da ami nuwabiibai ina rakata kirakai.”

*Yesu dobu ina bera kudubina ina ghegavovori.*

<sup>25</sup> “Weni sisiyisi kudubina na miibiiyai avivi sisiyei. Ma mara epipisi da ke nakanani ani sisiya. Tuna maranai aku Mamai ana vivisisiyei na sisiya maninina ana terei kurimi. <sup>26</sup> Nani maranai na avakuwai koni nowi. Avonavonemi da wekarakava tami mani koni nowi aku Mamai kurina, ke taku ani nowi kubiimi. <sup>27</sup> Tami nuwanuwaku koviiya ma kovi tumaghaneku da taku God gwabinai aoru. Tuna kubiine aku Mamai nuwanuwami iviiya. <sup>28</sup> Aku Mamai gwabinai aoru ku dobu, ma dobu ana kuyowei na ana vovira ana ghae aku Mamai kurina.”

<sup>29</sup> Ma kana kivikivina ivona bo, “Wekarakava na vaghina, am sisiya na yagharina ma ke kuta vivimiiba. <sup>30</sup> Wekarakava na kakova bubuni da tam bera kudubina kuakova yavui. Muriyai da wawaya i nota gavugavusi

iti tarakiyanem na tam namada kuakovi da kevonavon-  
apotesi. Tuna kubiine kaitumaghanem da tam God gwabi-  
nai kupisi.”

<sup>31</sup> Ma Yesu ivonapotesi bo, “Wekarakava na koitu-  
maghaneku, bo? <sup>32</sup> Ma mara iututuriyariya da namada  
iututanita da koni verubogebogeyanemi ami ku numa.  
Kudubimi kona verukuyoweku. Ma kegha da ke ina kiku  
kava ana makai, iyamna aku Mamai na mara nonowa  
gwabikuwai. <sup>33</sup> Weni berasi kudubina aiakovimi da  
nuwanuba gwabikuwai kona viiya. Weni dobunai ko-  
makamakai na nuwapoya ipeyari kona panapanani. Ma  
ami nota evirewapana, iyamna taku weni dobuna ina bera  
kudubina aghegavori.”

## 17

### *Yesu inipowana.*

<sup>1</sup> Yesu weni sisiyisi ivi kovini na itepa ku kunuma ma  
ivona bo, “Mamai, marana inekiibau. Taku na natum  
ma kaku kadara kevi debei da kaku vava ina rakata. Ma  
bade nani kamonai kam kadara ani debei da kam vava  
ina rakata, <sup>2</sup> iyamna tam rewapana kuvereku da wawaya  
kudubina ani badesi. Ma kuberai da iyavo kava ku imaku  
kuteresi na yawasa makamakii nonowina ana veresi. <sup>3</sup> Ma  
yawasa makamakii nonowina na weni. Wawaya tam ma  
taku inakova bubunita ma yavata tinuwasago. Tam ina  
kim kava na God vaghata ma kuvonataweku aoru ku dobu.  
<sup>4</sup> Ma aviyavisina kuvi yoneku na abera yavui da dobuwai  
wawaya kam kadara ikitai. <sup>5</sup> Mamai, muriyai da dobu  
ita tupuwa na ita viruwa kata kadara kamonai tamakai  
patapata. Wekarakava na kevokavariku da nani kadarina  
gwabimuwai na ku kamona ana rui me.”

### *Yesu kana kivikivina kubiisi inipowana.*

<sup>6</sup> “Iyavo kava dobuwai ku imaku kuteresi na avi akovisi da tam iyai. Ti wawayisi na tam rapemuwai ma kuvereku da karako na vonam evovotekatekei. <sup>7</sup> Wekarakava na iakova bubuni da bera kudubina rapekuwai na tam gwabimuwai ipisi, <sup>8</sup> iyamna vonam kuvereku na avi beyebeyena kurisi da iviia ma ivi tumaghanei. Iakovi da tam gwabimuwai apisi, ma bade itumaghana da tam kuvonataweku.”

<sup>9</sup> “Ti na tam rapemuwai ma kuvereku. Tuna kubiine ti damsi kava kubiisi aniponipowana. Ma ke wawaya peyarisi dobuwai kubiisi ata niponipowana. <sup>10</sup> Iyavo kava kuvereku na rapekuwai ma bade tam rapemuwai. Ma kaku kadara na ti damsi idebei. <sup>11</sup> Marana inekiibau da dobu ana kuyowei ma ana ghae kurim. Ma ti na patana da dobuwai ina makai. Mamai Vovokaravim, avam kuvereku na tuna ina rewapana kamona kevi tarapaparanesi da ini nuwasago. Ikikava tam ma taku tavi nuwasago, nakanani ti bade avamuwai ini nuwasago. <sup>12</sup> Maranai taku na ti yavata kamakamakai na avam rewapani-na akoyagha bubunisi. Nani avana na tam kuvereku. Avi tarapaparanesi da peyarisi na vaghina ma sago kava na ina wapa da aviyavisina giruma katamana kamona ivivi sisiyei na ina tupuwa. Tuna tomowina ina kina kava ina gawara na keyama karakarata makamakii nonowina.\* <sup>13</sup> Mara gisina kava na ana ghae kurim. Ma wekarakava taku patana da dobuwai na weni sisiyisi aisisiyei kurisi da aku nuwabiibai damina ina viiya da nuwabiibai nuwanuwasi ini tupoi. <sup>14</sup> Vonam na namada avi damani kurisi. Ma wekarakava ti na taku nakanani, akii dobu na dobu bogiiyai. Tuna kubine weni dobuna ina wawaya ikawapatesi. <sup>15</sup> Ma weni nipowanina kamona na ke ati nowi kurim da dobuwai kuna viitawesi. Ma ainowi da kuni tarapaparanesi da wawaya berona, tuna na Seitan,

---

\* 17:12: Psa 41:9; Jon 13:18

ke ina votovonisi. <sup>16</sup> Ti na ke weni dobuna ina wawaya. Ti na taku nakanani, akii dobu na dobu bogiyyai. <sup>17</sup> Vonam na vonavaghata ma tuna ina rewapanai kevovunaghisi iyamna kuvinetawesi da ti na am wawaya vovokaravisi ma am kayowana kava ina berai. <sup>18</sup> Iki kava kuvonataweku ku dobu na nakanani bade avonavonatawesi ina kiibau wawaya kurisi. <sup>19</sup> Ti kubiisi na averevere meyeku ma am kayowana ana berai da ti bade nakanani ina vere meyesi da am kayowana kava ina berai.”

*Yesu vitumaghana damsi kubiisi inipowana.*

<sup>20</sup> “Aku nipowana na ke weni damsi wekarakava gwabikuwai na ti kava kubiisi. Weni damsi ina dima ma iyavo kava ini yanesi ma ini tumaghaneku na bade ti damsi kubiisi aniponipowana <sup>21</sup> da peyarisi nuwanuwasi ini sagoi. Mamai, iki kava tam kamokuwai, ma taku kamomuwai da tavi nuwasago, nakanani keberai da ti na ku kamota ina rui da yavata tinuwasago. Ma wawaya kudubina dobuwai nani vinuwasagona ina kitai ma ini tumaghana da tam kuvonataweku. <sup>22</sup> Ma kam kadara kuvereku na avi damani kurisi, da peyarisi ini nuwasago, iki kava tam ma taku tavi nuwasago nakanani. <sup>23</sup> Taku kamosiyai ma tam kamokuwai. Ma wawaya dobuwai ina kitita da tinuwasago bubuna na inakovi da tam kuvonataweku. Ma inakovi da iki kava nuwanuwaku kuviiya, nakanani kaku kivi kivi na nuwanuwasi kuviiya.”

<sup>24</sup> “Mamai, weni damsi kuvereku na akayokayowei da ti na mara nonowa gwabikuwai da kaku kadara ina kitai. Muriyai da dobu ita tupuwa na tam namada nuwanuwaku kuviiya, tuna kubiine nani kadarina kuvereku. <sup>25</sup> Mamai Kiimatanim, wawaya peyarisi ke itakovim, ma taku akovim. Ma weni damsi na iakovi da kuvonataweku ku dobu. <sup>26</sup> Ma avi akovisi da tam na iyai, ma bade ana viviakovisi da iki kava am nuwaviina damina aviiviiya

na ti damsi yavata damina ina viiya, ma taku kamosiyai ana makii nonowa.”

## 18

*Yesu ipaniya.*

*(Mat 26:47-56; Mak 14:43-50; Luk 22:47-53)*

<sup>1</sup> Yesu ina nipowana ivi kovini ma murinai na kana kivikivina yavata Jerusalem kwanatuna ikiibutawei da Kidiron anaghina idamani ku nevana. Ma nevanai na oliv nawabina ku kamona irui. <sup>2</sup> Ma Judas, tuna viwawana wawayina na gawarina iakovi, iyamna mara nonowa Yesu kana kivikivina yavata nani ku gawarina iriyeriyesi. <sup>3</sup> Vaghina ma Judas ivi wawana Yesu kurina ma koroto ghamana ivi nowesi da ku oliv nawabina inekiibau. Taparoro babadisi i babada ma Perisi damsi na Rome damsi i seri wawayisi ma Taparoro Numana kana potapota ivonatawesi da Judas yavata inae, i seri ikavara ma ere kibekibesi ku nawabina irui. <sup>4</sup> Ma Yesu iakovi da aviyavisina peyarina ina tupuwa kurina, tuna kubiine imiirikiibau ma ivi tarakiyanesi bo, “Iyi koekwekwai?”

<sup>5</sup> Ma ivonapotei bo, “Yesu, Nasaret wawayina.”

Ma Yesu ivona bo, “Vaghina wawayina na taku.”

Ma viwawana wawayina Judas na kamosiyai yavata imiimiiri. <sup>6</sup> Maranai Yesu ivona bo, “Vaghina wawayina na taku” na damsi murimuriyai iririgha ku dowa. <sup>7</sup> Ma Yesu ivi tarakiyana meyesi bo, “Iyi koekwekwai?”

Ma ivonapotei bo, “Yesu, Nasaret wawayina.”

<sup>8</sup> Ma Yesu ivonapotesi bo, “Namada avonemi da taku na vaghina wawayiku. Taku koekwekwiku, tuna kubiine weni damsi kovoteresi ina nae.” <sup>9</sup> Yesu weni nakanani ivi sisiya iyamna namada ina nipowana kamoni ivonakiyaragha bo, “Wawayisi kuvereku na ke sago iyai ati wapai.”

<sup>10</sup> Ma Saimon Pita ina seri itina yavui da tomowa sago tinina katagheyana i ikiyaraghatawei. Tomowina na taparoro badana ghamana ina bigabiga wawayina ma kana vava Malkas. <sup>11</sup> Ma Yesu, Pita iyeghai bo, “Am seri kana ku gawara keterei! Namada aku Mamai ivineku da ani kamaghi kirakiiyei. Ma tam, kenotanotai da weni vokwarakwarana reduna ke anumai, bo?”\*

*Yesu, Anas maghinonai imiiri.*

<sup>12</sup> Nani murinai seri wawayisi i bada ghamana yavata ma Taparoro Numana kana potapota Yesu ivotatani ma ipatumi. <sup>13</sup> Kunona irutini inae Anas kurina. Anas na Kayapas rawana ma nani madeghinai Kayapas na taparoro badana ghamana. <sup>14</sup> Rorova Kayapas dughu kamoni ina nota iterei Jiu babadisi kurisi, ivona da ita biibai da tomowa sago ita rabobo i wawaya peyarisi kubiisi.\*

*Pita ivi bero da Yesu ke itakovi.*

*(Mat 26:69-70; Mak 14:66-68; Luk 22:55-57)*

<sup>15</sup> Saimon Pita ma Yesu kana kivikivina sago na koroto ma Yesu murisiyai inae da taparoro badana ghamana ina ku numa. Ma Pita kwinana na bada ghamana iakovi, tuna kubiine kovokovoghina da Yesu murinai numa garina ku kamona irui. <sup>16</sup> Ma Pita na matuketa kupunai ivivi koyakoyagha. Ma kwinana ivovira ikiibau da bigabiga wavine sago kurina ivi nowi, wavinena na matuketa kana koyakoyagha. Ivi vaghinei na Pita irutini irui. <sup>17</sup> Wavinena Pita ivonei bo, “Agunai da tam na nani tomowina Yesu kana kivikivina.”

Ma Pita ivona bo, “Kegha. Taku ke yavata.”

\*

18:11: Mat 26:39; Mak 14:36; Luk 22:42

\*

18:14: Jon 11:49-50



<sup>18</sup> Ivi nuba kirakai tuna kubiine bigabiga wawayisi ma potapota damsi keyama mukisi ivi karavowi ma imiiriv-iviri da ivivi rarana. Ma Pita inae kurisi da yavata imiiri ma ivivi rarana.

*Taparoro badana ghamana Yesu ivi tupavirei.*

*(Mat 26:59-66; Mak 14:55-64; Luk 22:66-71)*

<sup>19</sup> Nani kamonai taparoro badana ghamana Yesu ivi tupavirei, ivonei bo, “Kam kivikivina na iyavo kava ma aviyavisina kibeyebeyena?” <sup>20</sup> Ma Yesu ivonapotei bo, “Taku ke meyani da gavunai ati sisiya, mara nonowa debiiyai waway kurisi avivi sisiya. Waway iriyeriyesi ku kiki numasi ma ku Taparoro Numana da nani dobunai aku vibeyebeyena kudubina debiiyai aberabera. <sup>21</sup> Ma avi kubiine na kitarakiyana? Iyavo kava ivivi yaneku na ti kevonesi da aviyavisina avivi sisiyei na ti iakovi da ina vonem.”

<sup>22</sup> Ma Yesu weni nakanani ivivi sisiya na potapota wawayina sago maghighina iravi. Ma iyeghai bo, “Avi kubiine nakanani kuvi sisiya taparoro badana ghamana kurina?”

<sup>23</sup> Ma Yesu ivonapotei bo, “Mikeda avi sisiya bero na debiiyai kevi mamatara da aviyavisina avonei. Ma mikeda avona bubuna na avi kubiine kuraviku?”

<sup>24</sup> Ma vaghina Anas, Yesu ere patupatumina ivonatawei da taparoro badana ghamana Kayapas kurina.

*Pita ivi berome da Yesu ke itakovi.*

*(Mat 26:71-75; Mak 14:69-72; Luk 22:58-62)*

<sup>25</sup> Ma Saimon Pita miimiiriyai ivivi rarana ma waway viya ikitai na ivonei bo, “Agunai da tam nokoni tomowina kana kivikivina sago.”

Ma ivi bero, ivona bo, “Kegha. Taku ke yavata.”

<sup>26</sup> Muriyai tomowa sago Pita kurina ivi sisiya. Tomowina na taparoro badana ghamana ina bigabiga ma varesina

tinina na Pita ikiiyaraghi. Ma tomowina Pita kurina ivona bo, “Agunai da akitim, tam na Yesu yavata oliv nawabina kamona.”

<sup>27</sup> Ma Pita ina vibero ivi arobi, ivona bo, “Kegha.” Ivi sisiya ikovi na yaghiyaghinai kokoreko itou.

*Yesu, Pailat maghinonai imiiri.*

*(Mat 27:1-2, 11-14; Mak 15:1-5; Luk 23:1-5)*

<sup>28</sup> Mara boiboi vaghata ma Kayapas ina numiiyai Jiu babadisi Yesu irutini da kiivavo Pailat ina ku numa. Ma Jiu babadisi ke ita rui, iyamna ke i kayowana da ita puyakisi da Moses ina vonaviyoyovana iti kiigiiyei da ke kovokovoghina da Pasova kamna ita berai.\* <sup>29</sup> Ma Pailat ikiibau ku kupuna ma kurisi ivona bo, “Avi wavuna weni tomowina kovereveri?”

<sup>30</sup> Ma damsi ivonapotei bo, “Mikeda ke avi berona ita berai na avi kubiine kata rutinapiyei kurim.”

<sup>31</sup> Ma Pailat ivonesi bo, “Korutinaneyei da tami mani ami vonaviyoyovana ina rewapana gaburinai koni tupavirei ma koni wavui da berona iberai.”

Ma Jiu babadisi ighakiya da ivonapotei bo, “Kegha. Akii rewapana kegha da wawaya kani raboboi ma tami Rome dami kava nani rewapanina gwabimiyai.” <sup>32</sup> Yesu namada ina rabobo ketana ivi debei. Ma ikikava ivi sisiya da ita tupuwa na berasi etuputupuwa.\*

<sup>33</sup> Pailat irui ina ku numa ma ina seri wawayisi ivonesi da Yesu irutinaneyei kurina. Ma ivi tarakiiyane bo, “Tam Jiu damsi i kiivavo bo?”

<sup>34</sup> Ma Yesu ivonapotei bo, “Wena tam am nota kisisiyei, bo wawaya ivi sisiyeku na kuvi yanei?”

---

\* 18:28: Pailat na kupuna wawayina iyamna ina dobu na Rome. Ma Jiu damsi i kiki da ke meyani kupuna wawayina ina ku numa ina rui, ke yavata ina kam ma ke ina votovonisi. Pailat ina ku numa ita rui na ti mani ita puyaka meyesi.

\* 18:32: Jon 3:14, 12:32

<sup>35</sup> Ma Pailat ivonapotei bo, “Taku ke Jiu wawaya. Tam mani am wawaya ma ami taparoro babadisi i babada irutininim da kopisi kuriku. Aviyavisina kubera beroi?”

<sup>36</sup> Ma Yesu ivonapotei bo, “Taku ke dobu kana kiivavo. Mikeda aku vikiivavona dobuwai ita makamakai na kaku kivikivina ita kayaya kirakai, ma iti tarapaparana da Jiu babadisi ke kovokovoghina da ita viiniku. Ma kegha, taku na dobu sago kana kiivavo.”

<sup>37</sup> Ma Pailat ivi tarakiiyane bo, “Nakanani na tam kiivavo bo?”

Yesu ivonapotei bo, “Vaghina kevonavona. Weni ku dobuna atupuwa na iyamna sago kava, tuna na vonavaghata videbena kubiine apisi. Iyavo kava vonavaghata itumaghane na aku sisiya iyane ma evovotekatekei.”

<sup>38</sup> Ma Pailat ivi tarakiiyane bo, “Vonavaghata iyamna na avai?”

Ma ikiibau Jiu damsi kurisi ma ivona bo, “Weni wawayina, ke sago ina berona ata panani da wavu ata verei. <sup>39</sup> Ma ami kiki emakamakai da Pasova kamna kamoni wawaya sago gabura kamoni ani kiibuni. Ami kayowana ikikava, Jiu dami ami kiivavo ana votawei bo?”

<sup>40</sup> Ma namei irapotei bo, “Kegha, ke tuna. Barabas kakayokayowei!” Barabas tuna kayoghakighakina ma ina kayowana da Rome damsi i vidadana ita kutawei.

## 19

*Pailat ivonakiiyaragha da Yesu korosiyai ina tuparatui.*

*(Mat 27:15-31; Mak 15:6-20; Luk 23:13-25)*

<sup>1</sup> Nani murinai Pailat ivona na ina seri wawayisi Yesu irutini ikiibau da iwidiwidiya. <sup>2</sup> Ma urava iyiyona imetami da ku gayamina ivi kotei, kitana da nakanani ma kiivavo kana kraun. Ma bade tarasovo yebayabarina ivi kotei, ivi matakira da nakanani ma kiivavo. <sup>3</sup> Imiimiiriya kurina

ma ivivi rekwei ma ivivi namei bo, “Kiiwa kiiwa tam Jiu damsi i kiivavo.” Ma imiiritani ma iraravi.

<sup>4</sup> Ma Pailat ikiibume da koroto kurisi ivona bo, “Ana rui ma Yesu ana rutinakiibuwei da kona kitai. Ma aiakovimi da ke sago ina berona ata panani da wavu ata verei.”

<sup>5</sup> Irutinakiibuwei na patana da urava iyiyona ma gara yebayebarina ikotekotei. Ma Pailat ivonesi bo, “Kokitai, tomowina na weni.”

<sup>6</sup> Taparoro babadisi i babada ma taparoro numana kana potapota Yesu ikitai na ikiikiirara bo, “Kotuparatui! Kotuparatui!”

Ma Pailat ivonesi bo, “Korutinaneyei da tami mani kona tuparatui. Ma taku na ke sago ina berona ata panani da wavu ana verei.”

<sup>7</sup> Ma ivonapotei bo, “Tokai akii vonaviyoyovana kamonai evonavona da ita rabobo, iyamna ivonavona da tuna na God Natuna.”

<sup>8</sup> Pailat weni sisiyina ivi yanei na iyabumana kirakai.

<sup>9</sup> Tuna kubiine Yesu irutinaruwei ina ku numa ma ivi tarakiiyana meyei bo, “Tam mimei kupisi?”

Ma Yesu ke sago ita vonapotei. <sup>10</sup> Ma Pailat ivona bo, “Avi kubiine na kuriku ke kuta vivisisiya? Kuakovi bo kegha da aku rewapana emakamakai da ana votawem kuna nae bo ana vona da ina tuparatum.”

<sup>11</sup> Ma Yesu ivona bo, “Kara ke kovokovoghina da kuti badeku, ma God rewapana iverem kubiine. Ma nani tomowina ku imam itereku na tuna wawayina ina berabero irakata kirakai, ke tam nakanani.”\*

<sup>12</sup> Ma Pailat ivi paparana kirakai da ikikava keta ita panani da Yesu ita votawei ita nae. Ma koroto irapotei bo, “Weni tomowina kuna votawei ina nae na tam ke Kiivavo Sisa kwinana. Meni wawayina evonavona da tuna kiivavo na Sisa ikawapatei ma ighaviyei.”

---

\* 19:11: Yesu ivona bo ‘nani tomowina’ na Kayapas ivi sisiyei.

<sup>13</sup> Pailat weni sisiyina ivi yanei na Yesu irutinaki-ibuwei inae ku vitupavira gawarina da ipumakamakii tepanai imakiivipika. Nani gawarina Hibru gamosiyai na ikwatukwatui Gabata. Gawarinai wakima ipasiya da tepanai ibababa, tuna kubiine kana vava iyamna “Wakima ikepani.” <sup>14</sup> Ma Pailat koroto ivonesi bo, “Ami kiivavo weni.” Tuna madegha punai ma wawaya peyarisi namada ivi karei da Pasova kubiine ivovovunagha.

<sup>15</sup> Ma koroto irapotepotei bo, “Kokiivunui! Kokiivunui! Kotuparatui!”

Ma Pailat ivi tarakiiyanesi bo, “Ami kayowana da ami kiivavo ana tuparatui, bo?”

Ma taparoro babadisi i babada ivonapotei bo, “Akii kiivavo sago kava. Sisa! Sisa!”

<sup>16</sup> Vaghina ma Pailat ivonakiiyaragha da seri wawayisi Yesu ita tuparatui.

*Yesu ituparatui.*

*(Mat 27:32-44; Mak 15:21-32; Luk 23:26-43)*

Seri damsi Yesu irutini ikiibau da ita tuparatui. <sup>17</sup> Ma Yesu kana korosi ikavari ma kwanatu ikiibutawei, ma ibaba inae da ku gawara sago kana vava ‘Teuteu Koyana.’ Hibru gamosiyai evonavona bo ‘Gorugata.’ <sup>18</sup> Ma nani gawarinai Yesu ituparatui ku korosi. Ma tomotomowa ivi ruwa yavata ituparatusi. Sago Yesu katagheyanai ma sago dugenai. <sup>19</sup> Ma Pailat igiruma bo, “Yesu, Nasaret wawaya, Jiu damsi i kiivavo.” Igirumi ikovi ma seri wawayisi iveresi da Yesu kana korosi tepanai itutui. <sup>20</sup> Wawaya ipeyari kirakai nani girumina ivi yavi, iyamna Teuteu Koyana na kwanatu ririnai. Ma bade girumina na Hibru, Latin, ma bade Grik gamosiyai igirumi.†

---

† 19:20: Hibru na Jiu damsi gamosi, Latin na Rome damsi gamosi, ma Grik na Grik damsi gamosi ma wawaya kudubisi Grik ivi sisiyei.

<sup>21</sup> Taparoro babadisi i babada Pailat ivonei bo, “Ke kuna giruma da Yesu na Jiu damkai akii kiivavo. Ma weni nakanani kuta giruma bo, ‘Weni tomowina tuna mani ivona da tuna Jiu damsi i kiivavo.’”

<sup>22</sup> Ma Pailat ivonapotesi bo, “Aviyavisina agirugirumi na agirumi. Emakai.”

<sup>23</sup> Seri damsi ruwamaruwa Yesu ituparatui ikovi ma murinai na kana gara irereghi da peyarisi na sago sago duma iviia. Ma kana gara gurina na ke ita rereghi, iyamna garana iyamoni na ke ita bori ma ita popoi. Ivuvui da kudubina na sago. <sup>24</sup> Tuna kubiine seri wawayisi ti mani kamosiyai ivona bo, “Weni garana ke tagosiri. Virekwa sago taberai ma takitai da iyi kudubina ina viia.” Weni berana iberai na giruma katamana kamonai ikikava ivona da ita tupuwa na nakanani itupuwa. Igiruma bo, “Kamosiyai kaku gara peyarina ivorereghi

ma kaku gara gurina kubiine na virekwa iberai.”\*

Ma vaghina, seri wawayisi nakanani iberai.

<sup>25</sup> Yesu kana korosi ririnai na wivine viya ivivi miiriyana. Ti na ina maduwa ma ina maduwa tina kikei, ma Klopasi kawana ma Meri Magadarini.

<sup>26</sup> Ma Yesu ina maduwa ikitai ma kana kivikivina sago, tuna nuwanuwana ivii kirakiiyei na ina maduwa ririnai imiimiiri na ikitai. Ma Yesu ina maduwa kurina ivona bo, “Maduwa, weni tomowina kevi natunei.”

<sup>27</sup> Ma kana kivikivina kurina ivona bo, “Am maduwa weni, kevi maduwei.” Vaghina ma, kana kivikivina ivi vaghinei ma nani ravinai na Meri irutini da inae ina ku numa.

*Yesu irabobo.*

*(Mat 27:45-56; Mak 15:33-41; Luk 23:44-49)*

---

\* 19:24: Psa 22:18

<sup>28</sup> Nani murinai Yesu iakovi da ina Mamai ina kayowana kudubina ivi kovini. Ma giruma katamana kamonai ikikava ivi sisiya da ita tupuwa na itupuwa, ivona bo, “Kaiyoku ikanakana.”\*

<sup>29</sup> Ma ririnai na diudeu imakamakai, kamonai na wain tomatomana. Seri wawayina sago gumba iviia da ku wain ikiikutuvi. Ma ku hisop kiina ivi kavini ma ivororona da Yesu ku mutuna. <sup>30</sup> Vaghina ma, Yesu wain iumai ma ivona bo, “Bera peyarina avi kovini.”

Idune ma tuna mani kanumina inuwatawei ma irabobo.

*Yesu ghabaghabana igwariya.*

<sup>31</sup> Jiu babadisi inae Pailat kurina ma ivi nowi da iti vaghinei da seri wawayisi nani tomotomowisi ivi aroba korosiyai kaesi iti kiigiyana da yaghiyaghinai ita rabobo. I kayowana da tupuwisi korosiyai ita turaoruwana, iyamna viyakam kana mara itupo da iti karei. Ma tuna na mara ghamana ma vovokaravina, ke viyakam marasi viya nakanani. <sup>32</sup> Tuna kubiine seri wawayisi inae da nani wawayisi ivi ruwa Yesu yavata ituparatusi na kaesi ivi kiigiyana. <sup>33</sup> Ma ipisi Yesu kurina na ikitai da namada irabobo, tuna kubiine kaena ke iti kiigiyana. <sup>34</sup> Ma seri wawayina sago ina iyowai Yesu ghabaghabana igwariya na tara ma okowa isororo. <sup>35</sup> Tomowa sago weni berasi matanai ikitai na tuna imamatarei da vonavaghata. Ma peyarina idebei kurimi da konakovi da vonavaghata ma tami yavata koni tumaghana.† <sup>36</sup> Yesu ina rabobo kamonai weni berasi itupuwa da giruma katamana kamonai ikikava ivivi sisiya na nakanani itupuwa.

---

\* 19:28: Psa 69:21, 22:15 † 19:35: Weni dobunai Jon ivi debei da bera peyarina matanai ikitai da weni bukana igirumi.

Igiruma bo, “Ke tuwirina sago ina kiigiya.”\* 37 Ma bade igiruma bo, “Wawaya iyowai igwariya na ina kitai.”\*

*Yesu tupuwina ku buba iterei.*

*(Mat 27:57-61; Mak 15:42-47; Luk 23:50-56)*

38 Weni berasi ikovi na wawaya sago kana vava Josepa, ina kwanatu Arimateya na inae da ivi nowi Pailat kurina da Yesu tupuwina ita viiya. Ma Josepa na gavunai Yesu ikivikivini, iyamna Jiu babadisi iyabuyabumanesi. Pailat ivi vaghinei na Josepa inae da Yesu tupuwina ivi-  
iya. 39 Ma Nikodimas na Josepa ivi ruwai da yavata inae. Tuna wawayina didibara sago inae Yesu kurina da yavata ivi sisiya. Ma inenae na Nikodimas muramura ikavari, tuna 30 kilos ruvana ma kamoni na meya ma alo ghabughabusi.\* 40 Jiu damsii i kiki inununuri na ivi ruwa muramurana iviia da Yesu tupuwina ivovunaghi ma kwarewa vuna, poipoina ma gurina iviia da igerei.§ 41 Meni gawarina Yesu ituparatui na ririnai na vao. Ma nani vaona kamoni na buba vuna namada itarapapapai da karawaga iyamoni da imakamakai, ke sago wawaya tupuwina ku kamona ita terei. 42 Ma damsii ivivi yaghiyaghina, iyamna mara itupo da viyakam marana iti karei. Ma bade nani bubana ke ita rabaraba, tuna kubiine Yesu tupuwina nani dobunai iterei.

## 20

*Yesu rabobowai ivomiiri.*

*(Mat 28:1-8; Mak 16:1-8; Luk 24:1-12)*

1 Viyakam marana ikovi ma mara itom. Ma mara sowasowai Meri Magadarini ivomiiri inae ku karawaga. Ma ikita da buba kana gudu wakimina na wawaya itabiri

---

\* 19:36: Exod 12:46; Num 9:12; Psa 34:20      \* 19:37: Zech 12:10; Rev 1:7

\* 19:39: Jon 3:1-2      § 19:40: Kwarewina na poipoina ma lineniyai iyamoni.



ma bubana na kawabonabonaghina. <sup>2</sup>Tuna kubiine iverau da ivovira Saimon Pita ma Yesu kana kivikivina sago kurisi. (Yesu tuna tomowina nuwanuwana ivii kirakiyei.) Ma ivonesi bo, “Wawaya Bada tupuwina buba kamonaiviitawei ma ke katakovi da imapatana iterei!”

<sup>3</sup> Vaghina ma Pita kwinana yavata veru ivi karei ku buba. <sup>4</sup> Ivi ruwa iveru inenae ma kwinana iveru kirakai da Pita ikuyowei. Ivi nao, ku karawaga inekiibau <sup>5</sup> ma itawopika da buba ku kamona irugenara. Ma Yesu tupuwina kana gere na tuna kava ikitai da ikenakena. Ma ke ita rui. <sup>6</sup> Ma Saimon Pita na muriyai inekiibau ma maninina irui. Ma Yesu tupuwina kana gere ikitai buba kamona ikenakena. <sup>7</sup> Ma bade gara sago vonokunokuna ikitai, tuna na Yesu gayamina kana gere na gawara bogiiyai ikenakena. <sup>8</sup> Nani murinai Pita kwinana bade buba ku kamona irui. Ma Yesu tupuwina ikita kawai na ivi tumaghana. <sup>9</sup> Giruma katamana ivona da Keriso ina rabobo ma murinai ina vomiiiri, ma ivi ruwa patana da nani girumina iyamna ke ita vii bubuni. <sup>10</sup> Ma vaghina, kana kivikivina ivi ruwa ivovira i ku numa.

*Yesu irumatarara Meri Magadarini kurina.*

*(Mat 28:9-10; Mak 16:9-11)*

<sup>11</sup> Meri na buba kupunai imiiri ma itutou. Ere tuna itawopika, ma irugenara ku buba kamona. <sup>12</sup> Ma aneya ivi ruwa ikitisi, kii gara poipoisi, ma imapatana Yesu tupuwina ikenakena gawarinai na sago gayaminai ma sago kaenai ivivi makiiyana. <sup>13</sup> Ma aneya sago ivi tarakiiyana bo, “Wavine, avi kubiine ketutou?”

Ma Meri ivonapotei bo, “Wawaya aku Bada tupuwinaiviitawei ma ke atakovi da imapatana iterei.”

<sup>14</sup> Ma itavire na wawaya sago ikitai imiimiiri ma ke itakovi da tuna na Yesu. <sup>15</sup> Ma Yesu ivona bo, “Wavine, avi kubiine ketutou? Ma iyi kekwekwai?”

Ma Meri inotai da vao kana koyakoyagha na ivonei bo, “Aku tomo, Yesu tupuwina na tam kuviiya, bo? Imapatana kuterei? Kevoneku da ana nae ana kavari.”

<sup>16</sup> Ma Yesu ivona bo, “Meri.”

Meri imiiritavire ma Hibru gamosiyai ivona bo, “Rabboni.” Weni sisiyina iyamna, “Aku vibeyebeyena wawayim.”

<sup>17</sup> Ma Yesu ivona bo, “Ke kuna votaniku, iyamna karakava ana ghae aku Mamai kurina. Ma kenae da varevaresiku kuni akovisi da taku agheghae aku Mamai kurina, tuna bade na ami Mamai. Agheghae aku God kurina, tuna bade na ami God.”

<sup>18</sup> Ma Meri Magadarini inae da Yesu kana kivikivina ipananisi na ivonesi bo, “Ita Bada akitai!” Ma aviyavisina Yesu ivivi sisiyei na ivonaveresi.

*Yesu irumatarara kana kivikivina kurisi.*

*(Mat 28:16-20; Mak 16:14-18; Luk 24:36-49)*

<sup>19</sup> Sande ravi didibarinai Yesu kana kivikivina peyarisi numa kamoni ivi kiidaburana ma matuketa igudui, iyamna Jiu babadisi iyabuyabumanesi. Ma Yesu irumatarara kurisi ma ivona bo, “Nuwanuba gwabimiyai emakai.”

<sup>20</sup> Ma weni sisiyina ivonesi ikovi na imana ma ghabaghabana pitarisi ivi beyesi. Ma kana kivikivina ivi nuwabiibii kirakai da i Bada ikitai. <sup>21</sup> Ma bade ivona meyesi bo, “Nuwanuba gwabimiyai emakai. Ikikava aku Mamai ivonataweku na bade taku nakanani ana vonatawemi.”

<sup>22</sup> Nani murinai Yesu yana itawei kurisi ma ivonesi bo, “Kanuma Vovokaravina koviiya. <sup>23</sup> Ma rewapana ina veremi da wawayi i berabero kona notatawei na God ina notatawei. Ma i berabero ke kona notatawei na bade God ke ina notatawei.”\*

*Yesu irumatarara Tomas kurina.*

---

\* 20:23: Mat 16:19, 18:18

<sup>24</sup> Yesu kana kivikivina ivi 12 kamosiyai, sago na Tomas, ma kana vava kana viruwa na Didimas. Ma tuna ke yavata maranai Yesu irumatara kana kivikivina kurisi. <sup>25</sup> Tuna kubiine kivikivina viya ivonei bo, “Bada kakitai.”

Ma Tomas ivona bo, “Ke ani tumaghana da kunona matakawai imana itutui na gawarisi ana kitai ma pitarisi ana votovoni. Ma bade ghabaghabana pitarina ana votovoni na ani tumaghana da Yesu na yawayawana.”

<sup>26</sup> Taparoro sago ikovi ma kana kivikivina numa kamona i vi kiidaburaname, ma Tomas na yavata. Matuketa igudupotai ma kegha da Yesu irumatara da kamosiyai imiimiiri ma ivona bo, “Nuwanuba gwabimiyai emakai.”

<sup>27</sup> Ma ivona bo, “Tomas, imaku kevotovoni ma kekitai. Ma kevororona da ghabaghabaku pitarina kevotovoni. Nota ragharagha kevoterei. Kevi tumaghana.”

<sup>28</sup> Ma Tomas ivonapotei bo, “Vonavaghata, tam aku Bada ma aku God.”

<sup>29</sup> Ma Yesu ivonei bo, “Matamuwai kukitiku, tuna kubiine kitumaghaneku. Ma wawaya viya ke meyani ita kitiku ma kegha da itumaghaneku. Ma God ini biibiinisi da nuwabiibai ina panani.”

*Jon ivi debei da avi kubiine weni bukana igirumi.*

<sup>30</sup> Yesu matakira ghamaghamasi ipeyari iberai da kana kivikivina matasiyai ikitai, ma ke kovokovoghina da weni bukana kamona peyarina ata girumi. <sup>31</sup> Ma aviyavisina agirumi na aterei da tami koni tumaghana da Yesu na God ina Vivinevine Wawayina. Ma tuna na God Natuna. Koni tumaghane i na tuna avanai yawasa makamaki nonowina kona viiya.

<sup>1</sup> Ke mara gurina ma Yesu irumatarama kana kivikivina kurisi, ma berana weni nakanani itupuwa. <sup>2</sup> Mara sago kana kivikivina miikovimaruwa Taiberiyas\* tokana baranai ivi kiidaburana. Ti na Saimon Pita, Tomas (kana vava sago Didimas), Nataniyera (ina kwanatu Keina, Gariri dobunai), Zebedi natunatuna ma bade kivikivina ruwa yavata. <sup>3</sup> Saimon Pita turaturana ivonesi bo, “Ana nae ana wito.”\*

Ma damsi ivonapotei bo, “Peyarita tanae.” Inae da ku waka igeru, ma nani didibarinai na iwito mareba da ke iyana sago ita konai. <sup>4</sup> Ma mara boiboi vaghata ikitai da wawaya sago kikirai imiimiiri ma ke ita vogiini da tuna na Yesu. <sup>5</sup> Ma Yesu ivi kwatu kurisi bo, “Turaturaku, kade iyana kokonai, bo kegha?”

Ma peyarusi ivi kwatupotei bo, “Kegha. Ke sago.”

<sup>6</sup> Ma Yesu ivonesi bo, “Ami wito ku katagheyami kotawei na iyana kona konai.” Ma damsi i wito itawei ma ke kovokovoghina da wito ita tinepai ku waka, iyamna iyana ikona kirakiyei.\*

<sup>7</sup> Ma kana kivikivina sago Yesu nuwanuwana iviiviiya na tuna Pita kurina ivona bo, “Nokona Bada.” Ma Saimon Pita namada kupuna garana ivotawei ma maranai iakovi da Bada na yaghiyaghina kupuna garana iviia da ikotei ma ivi kapoka ku okowa ma iyeka ioru ku kikira. <sup>8</sup> Ma turaturana na Pita ikivini wakiiyai ioru. Ma wito na ere iyanina itini ku kikira, iyamna ke ita rabaraba, 100 mitas ruvana. <sup>9</sup> Damsi ku kikira ivoghae na keyama mokina ikitai ma tepanai na iyana. Ma ririnai na parawa yavata. <sup>10</sup> Ma Yesu ivonesi bo, “Iyana viya wekarakava kokonai na kokavarapiyei.”

---

\* 21:2: Taiberiyas tokana kana vava sago na Gariri tokana. \* 21:3: Luk

5:5 \* 21:6: Luk 5:6

<sup>11</sup> Saimon Pita ighae ku waka da wito itinaoruwei ku kikira. Iyana ghamaghamasi ikona na ivi 153, ma kegha da wito ke ita bewari. <sup>12</sup> Ma Yesu ivonesi bo, “Kopisi. Tikawaboiboi.” Ma ke sago kana kivikivina iti tarakiiyanei bo, “Tam iyai?” iyamna kudubisi iakovi da tuna na Bada. <sup>13</sup> Ma Yesu parawa iviyya ma irereghisi, ma bade iyana iviyya na berana sago iberai.

<sup>14</sup> Yesu rabobowai ivomiiri ma nani murinai mara ipeyari kana kivikivina kurisi irumatara. Ma weni tuna na mara kana viaroba.

*Yesu, Pita ikiiepepai.*

<sup>15</sup> Yesu kana kivikivina yavata ikam ikovi na Saimon Pita ivonei bo, “Saimon, tam Jon natuna, vonavaghata da nuwanuwaku kuviiya, bo? Am nuwaviina kuriku irakata, ke nakanani ma weni damsi, bo?”

Ma Saimon ivonapotei bo, “E, Bada, vonavaghata. Kuakoviku da taku nuwanuwam aviiya.”

Ma Yesu ivona bo, “Tuna kubiine aku sipu gegeyisi kevi kanisi.” <sup>16</sup> Ma bade Yesu sisiyina sago ivona meyei bo, “Saimon, tam Jon natuna, vonavaghata da nuwanuwaku kuviiya bo?”

Ma Saimon ivonapotei bo, “E, Bada, vonavaghata. Kuakoviku da taku nuwanuwam aviiya.”

Ma Yesu ivona bo, “Tuna kubiine aku sipu kekoyagha bubunisi.” <sup>17</sup> Ma Yesu ivoname bo, “Saimon, tam Jon natuna, nuwanuwaku kuviiya bo?”

Ma Saimon ivi nuwapoya kirakai, iyamna weni tuna mara kana viaroba Yesu ivi tarakiiyanei da nuwanuwana iviyya bo kegha. Ma ivonapotei bo, “Bada, bera peyarina kuakova yavui. Ma namada kuakoviku da taku nuwanuwam aviiya.”

Ma Yesu ivona bo, “Tuna kubiine aku sipu kevi kanisi.”  
<sup>18</sup> Ma patana da ivivi sisiya Pita kurina, ivona bo, “Von-avaghata avonavonem, yaragimuwai na tam mani kuvovororona da kuvivi kotevunaghim, ma am kayowanai kubababa. Ma kuna morapa na kuna vororona da wawaya imam ina patumi. Ma ina rutinim da gawara ke kuta kayokayowei na nake ina terem.”  
<sup>19</sup> Yesu weni nakanani ivi sisiya na ivi debei da ikikava Pita ina rabobo, ma nani rabobona kamonai na God kana kadara ini debei. Muriyai ivona bo, “Saimon, kekiviniku.”

*Yesu ma kana kivikivina sago.*

<sup>20</sup> Pita itavire na Yesu kana kivikivina sago ikitai, murisiyai ipipisi. Tuna tomowina na Yesu ina nuwaviina ghamana ma vaghina tomowina kam kamonai ivi rugwabi Yesu kurina ma ivonei bo, “Bada, iyi ini wawanem?”\*  
<sup>21</sup> Ma Pita tomowina ikitai na ivona bo, “Bada, nokoni tomowina na ikikava?”

<sup>22</sup> Ma Yesu ivonapotei bo, “Mikeda ata kayokayowei da nani tomowina yawayawana ita makamakai da aku ku vovira marana na ke tam am nuwapoya. Tam na kekivina bubuniku.”

<sup>23</sup> Weni sisiyina kubiine na vitumaghana damsi kamosiya sisiya wapawapa irakata, inotanotai da tuna tomowina na ke meyani ita rabobo. Ma kegha da Yesu ke nakanani iti sisiya, tuna ivona bo, “Mikeda ata kayokayowei da nani tomowina yawayawana ita makamakai da aku ku vovira marana na ke tam am nuwapoya.”

<sup>24</sup> Tuna tomowina na weni berasi kudubina matanai ikitai da weni bukana kamonai igirumi. Ma peyarita takovi da aviyavisina imamatarei na vonavaghata.

*Sisiya damona.*

---

\* 21:20: Jon 13:25

<sup>25</sup> Yesu bera ipeyari kirakai iberai. Ma anotanotai da weni berasi peyarina wawaya ita girumi na kara ke kokovoghina da dobuwai gawara ita makai da nani bukasi kudubina ita tura.

Gapapaiwa New Testament  
The New Testament in the Gapapaiwa Language of Papua New  
Guinea

Nupela Testamen long tokples Gapapaiwa long Niugini

copyright © 2009 Wycliffe Bible Translators, Inc.

Language: Gapapaiwa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

Updates

eBible.org

---

PDF generated using Haiola and XeLaTeX on 17 Nov 2018 from source files dated 17 Nov 2018

02820c89-25a2-533d-9e19-9a2d0e178860